

安雅堂未刻稿

安雅堂未刻稿目錄

卷一

五言古詩

卷二

七言古詩

卷三

五言律詩

卷四

七言律詩

卷五

五言絕句

六言絕句

七言絕句

五言排律

七言排律

卷六

序文

壽序

題詞

卷七

書

表

策問

啟

頌

贊

銘

疏

傳

紀略

碑記

卷八

墓誌銘

行狀

諫

祭文

入蜀集上

詩

入蜀集下

詞

安雅堂未刻稿卷第一

萊陽 宋·琬 玉叔 著

五言古詩

劉雪舫餽泉酒賦謝

賤子實頑疎讀書懷往詰賦命一何窮遭時多艱確已
矣復何言門內生饕餮禍本驗豺聲天心厄羊舌踪迹
同沙拌身名竟瓦裂倉卒檻車徵骨肉成死訣幸荷
國恩寬未卽賜臣玦待罪爽鳩庭呼天口流血甲士月
踐更刀鍛儼羅列嫚罵誰敢嗔供頓詎能缺充腸藜藿
甘伴寢銀鐺熱驚看膚已枯空餘骨未折臥疾謝參苓

何心謀麴蘖平生金石交棄我如蜣蜋梁肉委溝谿一
毛安肯屑之子未謀面顧子臨土穴問荅未終詞執手
但嗚咽側聞甲申春哲兄仗奇節百口盡祝融義比崑
岡烈南州有王生椽筆直如鐵作傳表英風快事稱雙
絕中夜鬼神泣毛髮森凜冽言君隱甓湖躬耕種瓜瓞
今我被讒口辱親愧閭閻載見忠孝裔心傷內如燕勿
聞青絲騎醇醪重提挈釀用錫山泉此味經年別舉醢
祭臯陶壺觴聊自啜寒夜羈魂安餘瀝小僮悅何由脫
尉羅共醉西山雪

義虎行

汾水有樵客刊木登崇岡霜濃崖谷滑身墜虎穴旁虎
子未離乳牙爪無鋒銚倉皇覓所見峻壁如堵牆久之
白額至萬壑風飛颺口銜半體物不辨鹿與麀磔裂飼
其兒何用春糗糧回身睨生人怒目森電光少焉咆哮
息若有所思量便擲所餘肉授客使客嘗有客不敢飽
惴惴臨鑊湯母子竟酣寢月曉山雞鳴客心私自忖朝
餐我其當寧知了不顧一躍凌大荒還期每亭午命食
遂爲常晨昏得暫飽飲血爲酒漿月餘負子行學步恣
騰驤樵客守空穴長慟呼穹蒼爲德何不卒主人忽我
忘熊豹倘來居何肯效慈良不爾亦餓死吾其葬此方

俄頃載之出耳畔松杉香茂林絕鳥跡日色曛以黃蹀躞向虎拜叩頭啟大王賤子姓甲乙家在縣南廂析薪餬八口失足踐貴彊恭承不唾恩惠養兼扶將前身爾當省或是父與兄辭家日已遠父母倚閭望我言若可解送我歸故鄉祝罷向前導果至來徑旁行行將告別主客兩徬徨樵言感再活報德愧微涼到家賣斤斧肥豕充爾腸郭外古瓦寺夾道雙白楊來月月三五饗汝亭之陽虎也領者再相視淚浪浪匍匐返蓬室家人驚且藏揮手喚其婦人也幾爲俚張燈進麥飯痛定話端詳鄰里半疑信瘦削類巫尪貧家乏芻牧自典籠布裳

鸞刀未及奏猛獸多宵行然諾懷一飯搖尾來通莊市
人競攘臂撻金騎屋梁不復施鉤楯罟網已在綱須臾
遭急縛獻捷躋公堂縣宰曰殺之庶以懲不祥樵客聞
此言槌鼓膺銀鍤長跪告明府大恩安可戕對虎話疇
昔堦前如聚商大王猶在口爲我受茲創乞命于神君
微軀請代僵宰也嘉其義解縛忍爾傷爰造所期處高
組陳餼羊舔啖盡斜刻逝矣何跳梁觀者隘衢路童叟
紛趨踰亭名曰義虎刻石傳郊坊楚國穀於菟書傳非
荒唐作詩表厥異愧彼中山狼

問鵲詞

窟室昧昏曉不知七夕過喈喈暮簷鵲毛羽半摧磨見
人如慚沮斂翼坐高柯借問爾何爲銜尾填銀河譬如
人間役髡鉗城旦科萬古有程期風俗非傳訛支機石
安在牛女年幾何鬢髮何不霜歲歲顰雙蛾契濶展須
臾此夜停鳳梭鈞天實耳聆寶瑟鏗雲和帝居渺何許
宮闕紛巍峩造舟以爲梁夫豈無黿鼉用爾傳下土天
孫結絲蘿皎皎鍼樓女乞巧會青娥瓜犀充玉盤硯舞
屢傴僂蛛絲告師氏競得歡且歌嗟余無一能微長拙
則多鬼神侮姦直投足嬰禍羅野田有黃雀化爲蚌與
螺吾生獨不然跼蹐長轆軻攬衣訴雲漢無媒愁譴訶

剛腸願湔滌鈍骨須切磋富貴如可求不惜爲祝鮀歲時忽已晚莫挽虞淵戈來年憶此語將命勿蹉跎

雨中讀書

簷溜掃堦除濯足因及膝歛爾神魂清忘其在請室殘書代高枕佳辰聊散帙古人生我前憂樂端非一爲樂何多方醫憂苦無術幽幽泣鬼神往往托紙筆當時每見嗤千載遙相恤我憂竟何如轆轤井中繒

見月

雨師將倦勤兼旬未停轡竊恐瑤臺傾月娥亦憔悴長天簪層雲皎皎東南出忽似久盲人去我眼中翳又如

佳客至寔然豈遑寐避溼屢移牀弗離尋尺位草蟲變
其響高下聞歌吹瓦樽聊自斟憂人易爲醉

夢先仲兄二首

昭昭此日月不復照憂窟嗟我同氣人生死悲汨汨哲
兄處我側鬚眉儼平口有時拊手歌忽爾變愁疾惻惻
骨肉言旣寤不能悉弱女未適人嬌兒方弄筆死者豈
不傷生者責難畢魂驚近來事附書報阿七

阿七季弟
珣小字也

痛矣藐諸孤朱殷血盈膝短燭滅伊蟻憂端密如櫛

維鳥蓋有羣維天蓋有斗蟾兔屢盈虧兄來月八九地
下網或疎豈無魑魅守稍稍行家園往往共杯酒鬼神

怯憂患哽咽長掩口汝弟在尉羅二親亦知否平生願
復心何以慰左右再詢迷所達寸心非我有撫枕一招
魂殘星動高柳

所居屋三楹蔓草生於瓦上守者驅小豎刈以飼
馬須臾畧盡感而有賦

黃雀銜草根芄芃覆我屋昔耶失所依薺蘿蔓成族憑
高勢自驕漸欲欺喬木多露館蚊虻蔽日棲蝙蝠野火
詎能侵跛羊不可牧我憂莽無蒂數椽聊托宿斧斨不
在掌吁嗟空以目腰鎌者誰子崇朝肆翦戮短棟落高
簷盈筐凡五六馬飢不待剉伴以新登穀天道忌滿盈

物態有傾覆鋤惡幸無遺城狐應殼鯨涼月在觚稜遙
天碧如沐肺病廓然瘳欣欣對老僕

夜坐吟

故人借我書兼借新歷看始知秋向分晷刻從中判如
何宵漏遲展轉不能旦無乃天官書羲和昧厥算烏啼
星漸稀蟲語砧無斷歌哭兩吞聲披衣起三歎

咏史

八首

宣子愛智瑤卜筮將爲後五賢一不仁諫者爾何謬決
水灌平陽驕貪因致寇何意釜中鱗卻斃林間狄國士
旣感恩讜言無一救漆身竟何益况乃志不就

古聖貴遠猷經邦戒謀始秦穆殺三良亂命一朝耳安
知家法垂視人猶犬豕數傳至祖龍赫怒六王死諸生
竟何辜坑之咸陽里勿嗟新法酷孫謀在前史

少卿陷狼荒司馬爲歎息上書坐腐刑公卿弗爲力洛
陽賈豎子牧羊拜高職窮愁著萬言發憤攄胸臆結交
慕游俠多財思貨殖名山今則傳銜冤竟誰直

秦兵圍邯鄲信陵抱深恥一邀朱亥行能使侯嬴死談
笑卻狂氛連城棄如屣驅車返大梁謝罪居田里悲歌
築糟邱壯心付牀第英雄作達人陋彼三公子

太尉血未碧無敢瘞骸骨綠幘爾何人哀哀夏門卒偉

哉門下士左手提章鉞傭身托六尺宗祊未淪汨種松
期歲寒觀人在倉猝使居高后時可以爲周勃

應侯旣得志誓漆魏齊首急難有虞卿棄印與俱走無
計抗秦威甘心作窮叟豈知孫賓石複壁藏死友成毀
安足論二子名不朽古道良若茲今人以爲否

崔生良史才博物綜墳典著書仿漢紀金石垂斑管春
秋諱定哀本朝必歸善奈何昧斯義坐歎宗支翦同時
載筆人青宮出諸險危哉太史遷宮刑猶幸免

魯史多傳疑石言表於晉所言夫如何尼父未嘗訊或
曰物所憑此理差足信孤臣孽子魂千年豈能訥滔滔

水東逝青山共磨礪師曠失其聰九原復誰問

煮枕行

華枕出剡溪最宜三伏夕耳畔喜清涼輕颼緣疎隙多
足爾何來茲焉爲窟宅安居長子孫蟄蟄盈千百宵行
晝簡出希踪狐與貉伺我鼻息酣分曹向阡陌覺後鮮
完膚夢中頻蹙額痛癢難爲狀罪浮於蠹螫隱忍安可
再呼兒因大索禍延白鳥殲撲共青蠅厄待旦訪根株
驚心在肘腋厝火昧前籌揚湯爲上策不聞蟣蝨弔俄
看釜餽赤老藤幸無恙鼎鑊敢逃責終然敝帷意未能
卽捐擲快哉永夜眠鮐背始沾席懷安肇戎毒禍福在

所擇書此示筦簞慎無畱惡客

縛鼠詞

我僕行丐歸不虞明日飯香杭白如玉未飽身已健
鼯鼠率其羣蠕蠕僅盈寸噬肯念予飢但欲充爾膺設羅
當穴口小童不勝懣貪饕禍所聚黠巧奚能遜畏人仍
奉首磬折如九頓我心方惻惻弗忍誅其困懽然脫拘
紲三窟縱橫奔釋氏等冤親先民戒滋蔓豈若兩相忘
可與達者論

長信秋詞

人言劍閣艱妾道長門險頻教翠輦迴坐歎朱扉掩寒

砧高下聲流螢四五點殘月下簾櫳自熨湘紋簾

秋思 五首

秋風本無意萬籟自成悲蔓草徒搖搖蕙華難獨持高樓今夕月知是怯羅帷

春日何逶遲商飈每倉猝我攀芳樹枝坐見流螢沒白露亦何爲星星練元髮

夜蟲奏商律斷續秋魂哭美人羅袂寒背月吹霜竹雨雨感人哀天聲不如肉

疎雨戛寒叢落葉紛如擊元鳥沐其羽何人有歸色故鄉豈不懷行行戒繒弋

女蘿在高松歲時有驕色嚴霜下稜稜莫肯相羽翼不
如野草花開落自努力

初度課僕縫衣

一室類禪龕餘年愧僧臘道氣生垢腸秋風欺絺綌晨
興盥我手鶉衣妨出納去歲已三澣今茲須百衲寧辭
僮僕羞況乃蟣蝨匝持此報山妻砧聲共鳴邑

送宋牧仲別駕之黃州

昔在天啟朝作人歌早麓南宮三百人中有先太僕相
國起中州殷人系同族連鑣京洛游晨夕疊往復有來
必盡歡濁醪十餘斛顧惟小子輩碎呬儼伯叔乾坤遘

鼎革相國秉鈞軸旁招天下士濫收及魚目登堂脫芒屨問答不嫌複語及九原人師容亦顰蹙側聞佳公子妙齡十五六傾都看衛玠羣公誇荀彧惜哉兩楹奠繁華萎梁木燕臺展契濶涕淚話疇夙俛仰數年餘滄桑一何速君今佐黃州豈曰耽微祿御者古有言驕驕戒初服矧乃山川嘉赤壁臨江蘊周郎與蘇子懷古情翬翬斷岸雪千尺輕舟帆一幅公餘恣游眺寄詩慰幽獨

徐塘口曉發

舟過十六間快如脫深井篙師喜不眠鳴榔夜相警暉暉星欲稀獵獵風初猛登艫一長望澄波浩千頃樹杪

見黃河蛟龍得所騁上下白雲光凌亂蘆花影宿鷺浴
還飛驚鴻斷復整孤棹破寒烟荷衣不知冷

贈徐月鹿水部

我友方龔山於世罕所可昔在古北平論文列燈火抵
掌話今古重門不復鎖發其笥中書見君詩篇夥昭昭
明月光忽爾懷中墮便付小胥鈔披吟不遑情問君復
何如荅言最英果當今風雅儔吾子屈一座杖策去盧
龍依劉適江左或於卮酒間絮談應及我嗟予誠濩落
適時獨坎壈白首歎無家桑枝棲螺廬古人重結交千
里餽糧裹茲當遠行邁握手清淮沱一見愜素心長歌

還鼓柁

雨中過僧舍聽沈山人彈琴山人善製琴今所彈者乙酉金陵客舍作已二十有二年矣

積雨不出戶溼氣逼幽幌屋小如漏卮決雷滿盆盎忽聞贊公房竹樓頗蕭爽不惜屐齒勞衝泥策孤杖到門鐘梵歇僧徒止三兩俯檻閱烟雲繩牀恣偃仰皤然一老叟抱琴來方丈乍撫一再行三峽哀泉響自言斲桐孫百尺龍門上審端面勢時悠然太古想金徽未及施宮徵在吾掌龍脣入都市王侯大稱賞通知匠者心冥搜窮罔象改絃燈火張絲桐一何朗惆悵不成眠道心

於此長

題王西樵長齋繡佛圖

浮生能幾何憂患居其半當其在厨羅刀俎何由遁四
大如贅疣拚飛羨鶴鶴細數從前愆口腹生罪案戕生
供一飽水陸烹飪換自大以及小巧力莫能算物微理
則同臨危想奔竄禍首始庖犧魚鳥紛然亂西方大聖
人戒殺經文粲衆生嗔且迷大笑以爲誕良由身未經
夏蟲不知炭吾友王考功同官復同難相逢摩訶池面
色黃如疸自從請室中蠲除肉與蒜示我東坡詩焚香
起遐歎小樓僅方丈似有天花散古來仙佛人第一貴

能斷審茲割愛緣卽是阿羅漢老夫愧蹉跎浹背有餘汗

嚴瀨亭太夫人壽

夙昔慕嚶鳴良朋以爲命載交嚴給事如見陶士行威鳳在層霄綵翮一何勁珥筆青瑣闥上書言利病章皇爲改容朕今得明鏡問卿何能然小臣固不佞高堂有母氏風規肅而正嚶笑罔敢愆矧乃職諫諍

帝曰都汝母德與敬姜并煌煌紫泥書大國秦與鄭爰及九牧人聞風仰徽聖千里或命駕登堂展恭敬余嘗濫此邦造廬代溫清今來逢燕喜華筵譜家慶給事未

及艾絲綸佇當柄翩翩金闥彥宮袍玉階映過末復鷹
揚棠華婉相競母也不政康勞謙在處盛錦堂聞紡績
彤管堪歌咏再拜行羽觴南陔庶可賡

題林鐵厓絮鐵冊子

鐵厓林公議屯田失邊將心中危法幾死其被
逮也僕人咸鳥獸散惟小史鄧猷相隨不去至
以絮裹鐵復以體溫絮奇矣周元亮爲作絮鐵
行故名之曰絮鐵公屬予和者屢矣予曰願一
見絮鐵詩乃成公期期持不可聞予履聲輒令
避去迺至深局堅鍵若將藏之複壁中者噫又

奇矣艤舟將發書此貽絮鐵並以誚公

林君海鶴姿負謗中山篋可憐強項臣墮此修羅劫蒼
頭及廬兒飽颺未轉睫婉孌者誰子問年方佩鞬九死
誓相從慷慨無嚙囁重繭逾萬里哀哀淚盈頰維時當
返寒河冰不須楫琅璫九曲盤縛公於馬鬣纍囚凍欲
僵緹騎仍夜獵之子解羅襦纏綿復週浹弗惜束素身
宵分爨以脅久之鐵竟溫適體如衷被公非繞指柔七
尺等秋葉佳哉此孺子智勇超荆聶何人編稗官借爾
光簡牒大書復特書將以告臣妾

寄懷施愚山少叅

昔我陷虎吻微軀蒙羈縲君方拜法曹顧余兩悲咽愧
乏平生歡定交在獄闌爰書未奏當忽作粵中別揮淚
遠行邁萬里憂心惓

先帝湯文姿沉寃荷昭晰狼伏厥辜再添鷁行列之
子在桂林賦詩見慰悅流傳及四方知我交情切王程
各有役先後秉符節絳帳遍青齊相望渺恒碣吾友下
禮曹詞翰果清絕同人濫吹獎葑菲采薄劣嚴張兩黃
門雅與夫君埒矯矯陳布衣騷壇稱七杰丁也坐微青
足踐辰韓雪余往送之郊淚痕欲成血武林展契濶停
杯爲汝說引領鑒巫問怛焉肝腸絕蕭齋抵足眠鮭菜

弗爲褻惜哉困簿書倡和至今缺是年辛丑冬禍發由
蟻穴同室產鴟梟傾巢恣餐齧

天威赫雷霆小臣將隕滅痛哭十年前茲焉倍酷烈百
口若卵危萬端付瓦裂搏頰呼蒼天天門高蕩跌古人
死多門膺滂何罪孽所恨目不瞑未與良朋訣一朝閻
闔開曦陽照幽蟄

天王實聖明宗祀存羊舌羅網幸脫免江湖轉騷屑綈
袍邈千載世情恠一歎方知飢與寒憂患竟同轍匪不
告緩急逢人多面熱登艫眺廬陵瀕洞風濤截欲訪梅
尉宅挂帆復中輟長跼寄雙魚恐君不忍聞

題尤遠公觀梅小像

駐世貴無營看花亦須福常聞鄧尉山梅花遍臯陸思
欲命扁舟佳辰翻躑躅先生鸞鶴姿探奇日不足慈菴
渺靄間香光滿巾服瘦筇矯若龍德容靜如鵠何時辦
青鞵從君於薊軸

壽戴巖屏先生

大海水所歸哲人衆斯仗夫子龍鸞姿身尊道何廣耿
介立天闔載振雲門響衮職賴彌縫平均在三壤峩峩
泰山松臨風倍蕭爽赤鳥映冲襟遇物多宏獎賤子忝
倉曹繆荷知音賞侍宴或終宵醉臥車茵上羣嫿忌清

剛三台忽瞬燭終焉魚水恩邦教需公掌退朝展多藝
揮灑龍蛇榜淡墨寫簣簣森然似初長奏御至尊前歎
息世無兩諸公餞疏傳暫輟京華鞅駒駟羨雙騁岌嶮
珠宮榜季方拜法曹懸犀照魑魍平反出鯉庭肺石咸
無枉故吏愧彭宣稱觴倚几杖金焦秋正深從公辦衣
綈

螢苑懷古

昔予遠行邁祗役赴隴首驅車洛陽道歸然見高阜土
人驚古瓦莓苔一寸厚大字開皇年離宮此遺甃當時
宅天中筐篚通九有後王乃荒淫失計東巡狩緣山創

飛甍臨江起廣罔條支貢異卯渠叟來珍獸庭燎燔都
梁高柯衣文繡秋宵宴未央流螢照朱牖婕妤拜手勅
輕紈競相鬪火齊不足侔桂館紛如畫事與烽燧同玉
齒粲褒后秦鹿一朝奔衛鶴詎能守我來訪迷樓荒榛
竄鼯鼯坐撫邗水流興亡歎車覆空餘熠燿飛年年滿

林岫

晤石谿禪師於祖堂喜而有贈

篋輿陟危椒杉篁密難度相將倚輕策天闕在回顧蒼
茫但烟靄不復辨來路倏聞鐘梵聲肅然脫雙屣瞻茲
大法堂天花粲如雨裊勒赤烏朝松畱天監樹興亡渺

千載爐香方一炷大師據繩牀音儀嚴童孺維摩病起
時天人齊了悟嗟余逢世難悲憫問共故回首百慮錯
六州豈能鑄如彼遠行賈揚帆值狂飈幸免飼蛟龍心
魂長恐怖未割區中緣矧乃年齒暮充盤剝鮮笋簞燈
煮霜芋永顧畢餘生結茅於此住

贈別方繡山年兄

世廟之四年臨軒再傳制鵷鸞集彤庭驂駟刷幽薊我
友龍眠君長余近十歲同拜小司徒鹽鐵參會計粉署
頗幽閒燕好若唐棣往往盃酒間從容問家世美人迺
多男各隕弓裘涕後先持符節遙遙去荒裔鴻雁日南

翔音書轉迢遞君家念山子間關到恒碣入門爲我言
哲兄在江滌五十誕寧馨先疇庶能繼翻然乞骸歸棄
官等秋蛻買宅石城旁躬耕奉租稅斯語十年餘賤子
屢顛瘠讒人實罔極天心示黥劓一朝脫尉羅三載困
狂獠沙鷗信不羈水萍渺無蒂杖策款柴扉欻欻互掩
袂契濶不遑論但話艱危際談虎賀更生驚心到僕隸
須臾列酒漿霑醉成小憇呼兒牀下拜殷勤復婉孌天
馬未絡頭萬里志精銳袖中出奇文筆底風雷勢燈闌
雅擊節老眼不知翳孔融自天人陸機稱夙慧所貴在
賢達匪徒富文藝去歲客吳門買妾得佳筮果爾夢熊

罷宗祔幸無替方將往提攜因乏理歸棹惜也限殊方
流寓禁方厲萬一功令寬庶從陽羨例小巷願比鄰長
鑣飽蠹櫺二老躋耄期兩見續昆弟龜策倘肯從畱書
表軒砌

題金孝章次子運甓圖

陶公志匡濟辛勤少暇日彭澤五男兒總不好紙筆華
胄未云遙箕裘闕繼述世變鮮安全聰明貴嵒室當時
寓意深非由家訓失吳門有隱君雅與淵明匹及其命
仲子遑遑如恐失躬耕林屋側偃息守蓬葦脫粟不盈
倉鳴琴時在膝旣果鹿門棲肯爲鶴書出但願學古人

轍跡寧須一何必督八州乃足垂名實大易尚乾惕幽
風戒無逸再拜閱斯圖使我增戰慄

八月十五夜同施愚山泛舟湖上聽莊蝶菴彈琴
自枉豫章書歲序凡屢移久客如蕩子幸免溝壑危忽
聞故人至喜極不遑悲驚定轉嗚咽涕泗交雙頤窮途
長兒子歡然前抱持湖光信清美況當三五期秋萼尚
可翦桂萼方藏蕤倖繞延素月嬋娟來何遲賴有廣陵
客清商彈哀絲颯然風雨外靜夜蛟龍隨佳辰此邂逅
後晤安可知矧茲遠行邁扁舟去武夷問我渺安逝鬱
邑難爲辭螺江有征鴈且記南游詩

施愚山至杭嚴顥亭招集臯園漫成一首

故人宣州來君方孺子泣相將具要經沈澗雙袖溼高
館城東隅曰爲慈親葺周覽御輕軒焚香事禪習烏稗
種未高鶴馭嗟何及舉座掩金卮銜盃不忍執憶昔盛
壇坫吾徒滿京邑絕響嗣黃初風雨筆端集忘劉一彈
指存沒堪嗚咽幸餘二三子況乃隔原隰臨流羨白鷗
飛翔偕出入夕陽下闌干別袂荷香襲卜隣庶不違吾
其辦簞笠

送姪幼文歸里

昔我領符節脂車向秦甸游子懷故邱暫得還鄉縣汝

髮未成童膝上背文選竹馬一相送西郊事飲餞別來
十五載不見阿咸面豺虎獨何心蒼素使人眩牢修朝
上書

天威赫雷電滋蔓及宗支吹毛到親串虎口爾幸畱痛
矣吾家彥蕭蕭白楊下銜冤詎能瞑閭闔九關開陰霾
一朝散薄劣豈能全先人或餘善短狐工射人屢廷登
聞院對簿客西泠孤蓬任流轉畱滯賦旌邱依人同旅
燕跼然骨肉至窮途共慰唁載咏鴟鴞篇淚與江波濺
年來夢熊羆泰占已三踐足取慰桑榆老懷聊暫遣方
知蒼昊意不忍專霜霰行行告將辭纔解意猶戀故園

諸謝在寄書未遑徧但言掃柴荆馬卿今已倦二勞在
杖底及爾偕游行暮齒幸未頽佳辰庶可撰

汾湖行爲葉元禮作

往者歲乙酉避地東南隅舟行過八尺居人驚且逋爲
言亂兵起烈火燒姑胥今朝令箭至抽丁兼索租不知
何將軍傳聞或姓吳軍聲雷電疾後至將爾屠吁嗟太
平後未識戈與矢逝將往樂郊安能懷故都公等來何
方慎勿登危途汾湖在咫尺中有葉大夫生平重然諾
鄉里稱顧廚流離依主人急往毋踟躕借問大夫誰通
籍先人俱懷中刺甫通倒屣迎門樞灑掃所居堂簞簞

羅精麤上牀寢兄弟庖福安童奴酒漿及醢酪朝夕任
所需纍纍近百口不言鄉里殊堂西有精舍繞砌生高
梧曰子館其中偃仰良足娛惟公有愛女嬌嬌神仙姝
乘鸞去何早碎此明月珠招魂來碧海鳥爪同麻姑香
奩委塵土髣髴餘流蘇紗窗猶窈窕苔蘚侵銅鋪亭亭
謝家樹華萼森扶疎念我苦邪癰背上書朱符文襖抱
爾出冰雪凝肌膚同時客君里冠蓋連交衢嘖嘖語大
夫兒也千里駒東坡盛菡萏況多菱與蒲時泛蜻蜓舟
斗酒相招呼盤餐進紫蟹玉粒炊雕胡是年八月中幕
客陳師徒堂堂鵲鵲陣白幟紛如茶鐵脰寧足恃螳臂

何其愚湖水半爲赤曲港漂人顛旌門謁主帥跣足露
泥塗遂得歸鄉國虎口脫須臾南鴻恨疎絕歲月忽相
踰國恩誠忝竊世路莽崎嶇顧我山陰道問荅增欷
歔痛哉吾父執隧道穿狸狐封胡遏末輩奄忽歸黃壚
渠渠舊閭閥一炬今爲墟勞人日鞅掌缺然展生芻愴
然猶子悲懷抱常區區朱並爾何人含沙肆飛誣天
高聽則卑臣罪實無辜鼠牙倦奔走僕夫亦云瘁賴子
相過從沉憂聊暫愉花晨或命展月夜猶操觚別離近
三載鬢鬢數莖鬚依人客真州猶勝成都壚古來成令
名往往由笑孤雖過賈生年未棄終軍繻努力抗前修

勿爲嗟其駒浩歌感今昔欲碎樽前壺

同諸君子游道場山是日稍晏及半而返賦詩志
憾兼訂後遊

我慕道場山臥疴未能出開軒見浮圖森銳似卓筆晨
興散微雪層雲漏寒日爰假青翰舟良朋凡六七先期
戒行廚裏糧兼聚栗方將恣遨游幽探雲霞窟放棹峴
山側驚飈何凜冽客子衣裳單興來不遑卹坡陀倚瘦
杖叢篁厭蒙密石磴半欹危凍泉屢通室側身窺絕壑
駒杳黑如漆百步輒一休雙童實予弼腰膝輸少年於
茲驗衰疾遙岑隔烟靄暮色轉岑崒將尋處士墳未踐

支公室張燈招同游樵徑恐相失回橈述見聞所歷分
甲乙素心幸已酬勝事詎云畢終期陟崇椒再出勿倉
卒人生不滿意茲游乃其一

送汪舟次游廬山

好鳥非幽林無以肆頡頏名山無主人游子慘不悅我
友施宣城坐擁江西節招我游匡廬書來誇奇絕開緘
意已往滿眼見巉巖惜哉物役牽老慚筋力劣扁舟凡
屢艤挂帆行復輟之子樂窮探芒屨逝將別中路見早
梅到日踏踐雪側聞香爐峰千尋挂虹霓白雲出牀足
繁星可攬擷置身巖壑間森然見孤潔寂寥徵君館蕪

沒高僧碣往者陶謝輩詩篇或遺缺山經與水志登臨
須考覈廬陵有故人懸榻爲君設想像西軒中開樽話
所閱何時一把茅共向東林結

花朝前五日同劉紫谷王爾調趙晉公姜勉中奉
世看光福梅花舟中微雨遇嚴武伯歸自山中邀
之使還因信宿徐長民精舍有贈

四載客吳中山川已漸習鄧尉未百里梅花成都邑方
將理輕策佳辰渺難及苦爲物役牽往往風雨急茲願
誓終踐先期辦行笈同儕三五輩欣然具簞笠云有賢
主人雞黍頗能給便買蜻蛉舟安能待驚蟄中路值緝

公衣襦半霑溼示我瑤華篇芳香紛可襲遂造幽人居
賓主花間揖松梧饒古柯茅茨告初葺几杖高曾遺燈
火兒童集開軒面太湖漁舟黑如粒峩峩冰雪姿清光
被原隰思欲秉燭游中宵坐復立生憎蜂翼忙止恨鶯
聲澀縱覽及朝暉魚貫復輿入信宿客自畱白駒未須
繫

贈胡省游

達士尚孤懷通人有高寄稽生雅好鍛阮孚乃蠟屐非
關玩物情聊以寓吾意維楚實多才之子負深致言觀
廣陵濤萬里瀟湘至靈均邈千載風騷爾其嗣袖中岫

樓碑蛟龍纏鳳翥西漢溯羸秦冥搜剖元秘復見蟲鳥
文或聞鬼神泣邂逅得縱觀顛倒及篋笥揩拂生光芒
瀟然心魂悸王侯甲第高欲往羞委質畱滯仲宣樓自
搵荆山淚分手重徘徊臨風還徙倚

送許鶴沙臬長之任滇南

四首

君昔在承明珥筆侍

先帝視草香爐邊朝夕資獻替爰輟講幄臣俾以屏藩
計再拜出闕廷

至尊頗凝睇敢辭劍門險彌節章江滌龍髯泣鼎湖乾
坤忽陰曠采蓴三泖濱聽鶴九臯唳今

皇法湯文求治一何銳刑期於無刑要囚不忍蔽深宮
念遐眈睠此西南裔上古所不臣版圖乃新隸誰能宣
朕心黔黎免黥劓淑問如臯陶欽哉汝其繼

朔風淒以冽鴻雁鳴啾啾蘆溝雪一丈桑乾凍不流之
子瘦如玉未勝鼪鼠裘豈不惜離羣王程不敢畱驅車
遠行邁駕言赴昆州碧雞與金馬上與白雲浮其地聯
百蠻兵興困誅求哀哀此子遺慘慘歌蜉蝣干羽格有
苗禹功猶可脩願言寬文網敷政在優柔夜郎歸漢德
白雉來宗周要荒致刑措

聖主解殷憂登臨多暇日新詩煩遠郵

祖道宣武門冠蓋盛華簪健兒擁弓刀載驟何駸駸方
將歸子舍歲晏慈母心平生未離膝此別實難任況乃
渡五溪風濤多毒淫攬涕向客言濁酒不盈斟臨歧執
君手太息忽霑襟請歌小宛篇恭人如臨深勗哉邁種
德庶慰蘭陔吟昔賢雋不疑高堂有良箴

今春客君里賦別白苧城何期游京洛送君萬里行因
題尺素書爲我貽友生瑯琊盛才俊父子擅詩名篋中
競渡篇淡墨紛縱橫周顒有別墅坐對機山平畱客大
牀眠自煮鱸魚羹廣川兄弟好繁露書已成布衣延陵
君北郭開柴荆醉中喜聯句往往通雞鳴別來未云久

斗柄東北傾諸君定相憶問訊饒深情但言客憔悴方
將謁公卿何由托陽鳥奮翼渡南征

題吳漁山倣吳仲圭畫

昔人作山水凝神在盤礴經營慘淡間不苟等戲謔作
者與賞心要當富邱壑吳生大雅人清姿如野鶴毫端
走鬼神古人庶無忤持贈萬里行披圖儼酬酢誦君遠
游詩不減謝康樂征鴻去悠悠相望何寥廓葡萄江水
深勿使蛟龍攫

賦贈方爾止

二首

余生窮海陬夙昔寡儔侶側聞古人風定交在日杵微

尚審所諧未敢輕相許
瞻言采芙蓉遙遙隔江渚
一朝至南徐乃見孔文舉
軒豁披心胸淵立托毫楮
良友若新姻似欲忘羈旅
三復瑤華音何以報爾汝
論文共吳沈吳錦雯沈冠東同寓殘月共高炬
客有餽鱸魚炊藜夜深煮

孔翠雲間翔鳬鷺澤中趨
赤驥弗遭時未免爲轅駒
子雲鄙雕蟲方朔歎侏儒
往往英雄人矢志成酒徒
與子逢世亂間關走崎嶇
誰言鄉縣異不嗟道里殊
執手臨江樓旌旆滿山隅
黃雲暗西北日夕羣鷗呼
利劍不在手四顧無良圖
來隱具扁舟叩其惟爾須

寄懷王敬哉

四首

陶陶孟夏初繁陰散林莽倉庚來好音交交自儔伍念
我平生歡浮家托柔艣食薇敢言貧采茶不知苦微雨
沐庭柯悠哉望鄉土

鄉土杳何許青齊與燕趙與君雖異居疇昔同弦眺中
原戰伐多豺虎紛然擾昔爲礪中栢今如路旁草努力
莫棄捐風波慎昏曉

昏曉迭往還行坐日默默感彼江海人攀蘭向南國釋
我無與親揚舲渺安極尉羅方高張前路多矰弋鴻鵠
莫輕翔修鱗尚潛匿何用慰離憂長謠以相憶

相憶詎云已離憂難可任遠遊有高步索居無餘心吳

江森浩渺越嶺鬱崎嶇飄飄慙慙追討母爲嗟滯滯君發
春申渚予夢天姥岑願言結茅茨方將理瑤琴

贈黃坤五先生

桂樹冬葳蕤霜霰未能枉嘒嘒長庚星向曉曜彌朗維
昔屬休明六字清且廣嗚呼先大夫通籍春卿榜清廟
走琅玕包匭兼篠簜宛彼金閨彥結契青霞上威鳳在
層霄毛翮殊森爽誰持太阿柄闕此雲門響遂與仲容
輩舍睇歸元壤賤子溝壑餘未敢辭鞅掌再拜于湖旁
攬泣話疇曩交情得孔融零落悲任昉升堂解葛屨顧
予多宏獎虛慚抱關役屢負清秋賞咫尺謝家山紆軫

難獨往安得牛渚犀入水驅魍魎落日葭莢明臨流送
歸槳夢想武夷峰願作青藤杖著書小太元精義窺罔
象勿遽秘名山庶以裁吾黨

上胡此菴先生

紫燕服鹽車跼蹐上太行一朝遇王良奮首乃騰驤貴
賤各因時世俗空低昂賤子東海隅疇昔懷飛揚十五
讀父書十八遊帝鄉高冠佩陸離孰不笑其狂弱冠貢
有司慚愧賓于主上書不見收三度宮槐黃退耕把犁
鋤淹臥廬山旁側聞吾夫子作賦凌建章清襟照倫輩
皎皎若秋霜黽勉慕高義夢想在沅湘漢廣不可涉欲

濟誰爲梁何期兵戈後乃升元禮堂如彼砮矟石得分
結綠光如彼斥鷃鳥得與黃鵠翔譚經虎皮座絳幃羅
笙簧顧予儔伍內盼睠良非常琴尊四壁靜侍立恒負
牆尚論古人書精義貫毫芒高視星辰外意氣橫八荒
四載失趨庭嚴如聞義方平生恥頌恩感激忽涕滂草
木有葵藿猶知念穹蒼人如忽此理何異生空桑安能
割心血報荅三春陽

庚寅獄中感懷 四首

商飈涼勁秋昊天降霜露采采孤葵根展轉愁其足幽
蘭在庭柯馨香莫能蠹君子諒不惜零落傷中路庶事

多貿理人生信所遇俛仰終古間誰知龍與蠖

夸夫競權勢志士懷榮名殺身非一端天道常患盈湯
湯桐柏水有時濁且清義和無停策日月東西征自非
空桑子豈不念所生宛彼鳴鳩詩悽惻涕沾纓

中夜聊假寐饑饉嚙我耳擁褐步檐櫺衆星粲可指中
有琴歌聲清商激綠水哀絃隨悲風曲終忽變徵茲音
久不作勿乃鄒陽子沉憂蕩精魂欲訴誰爲理

僕夫橐餕粥投筭誰能餐徒隸向我語廟室西南端往
者楊左輩頸血於此丹恍惚陰雨時絳節翳飛鸞再拜
招其魂殺氣不可干嗟余亦何爲喟然傷肺肝

春日同沈象調陳路若集米吉土齋中分得庚字
旅臥不成寐遙愛西山晴朝光曜衣屨嘶嚙聞初鶯故
人隔深巷車轍分縱橫良辰相與惜往往多徒行喜無
髮可櫛盟畢扣柴荆素心三五人列坐當軒楹開樽話
疇昔使我心骨驚大兒翦春蔬次兒吹玉笙新雛弧尚
懸隔戶聞啼聲相顧慰懷抱傾倒及茶鐺去亦不復揖
來亦不復迎空山多白雲雙犢同爾耕

感懷五首

鷓鴣雖小禽不肖棲危枝雄雞斷其尾竊恐將爲犧榮
瘁無定轍禍福還相基柱下有猶龍所貴守吾雌奈何

今之人翹翹忘此規臨岐空歎息羽括何由追

烈火或遺林安波有駭舟豈必太行險廼足摧雙輪嗟
我入犴狴百日仍淹留不惜憔悴苦但問罪所由愧無
曾參操素杼已見投蒼天察區區誰哉此爲謀

招搖指東北白草何茫茫雪霜深至骨客子寒無裳夜
長燭不繼鬼火森幽房魍魎露一腳跳嘯立人旁見之
了無畏憎其醜且厄安得晨風翼駕言歸故鄉

昔在狼狽初金鐵貫兩肘家人廼星離倉皇各奔走須
臾不自謀形骸竟何有急難夫爲誰賴我二三友誰云
鮑叔牙此義今遂朽木瓜古有篇報之以瓊玖撫心審

未能長歌愧顏厚

鵲鵲飛搖搖悲鳴何徘徊惻惻念同生跋涉登崔巍鄉
關日引領不謂音書乖道路紛豺狼冲惕盈中懷願言
加餐飯勿爲心摧顏中田蔓葛藟生死相與偕

孫末年敬刊

曾孫

字宣寧

校訂

安雅堂未刻稿卷一終

安雅堂未刻稿卷第二

萊陽 宋 琬 玉叔 著

七言古詩

挂劍臺

在張秋鎮

延陵季札賢公子腰下芙蓉淬秋水一片心期不忍寒
蕭蕭隴樹虹霓紫歷聘諸侯未反命魚腸剗刃王僚死
躬耕三讓宗家法吳邦不受輕如屣當時列辟尚權謀
劍客縱橫仁義否君臣父子競相居谷風之刺徒爲耳
公子深憂在萬古聊因死友扶人紀縞紵非無肝與僑
千金獨向徐君委竭來酌酒想遺風荒臺半圯埋寒叢

麒麟寂寞一坏土誰其樹之松柏桐人言墓草似千將
輓轡鐔鼻將無同三十年來不復甲枯根或化爲蛟龍
水湯湯兮風烈烈篝火黃昏讀殘碣金石有時銷此誼
長不滅君不見交態紛紛等阡陌任昉門前無弔客

王中恬先生七十壽詩

具區澤畔烏衣巷孟陬之月星辰降石麟墜地信有神
咳吐成珠氣如虹一朝獻賦蓬萊宮是父是子拜舞同
觀者咨嗟至尊歎桓家馬步何其工秘圖山下神明宰
歸來三徑滄桑改龍威丈人書獨窺皇甫先生宅還在
蒼水使者乘星輶再命而僂罔敢驕九牧知名爭執轡

賤子何幸能聯鑣孤竹城邊吐胸臆官梅閣下承顏色
縱飲從教百榼傾登臨不假雙童力去歲曾探日觀峰
裹糧未得躡游踪吳門匹練老能識水曹但見青重重
一餐沆瀣身逾健五枝爲餌青精飯蒼松同拜大夫風
黃菊還堪徵士伴絳縣編年甲子長鹿門夫婦敬相莊
百歲觥籌洛陽社一門羔雁太邱鄉大隱從來在衡泌
翻笑商山輕此出醉呼明月影成三倦昇藍輿吾其一
午夜星橋沸管絃笙歌新譜白華篇漫從江左謗羲獻
共說人間有傴僂

送李方山之溟南幕府

海內大兒孔文舉生平未得相爾汝湖上相逢驚我在
剝啄到門無一語坐久方言在豫章聞君遘禍如膺滂
凶問紛紛未敢信可憐子敬人琴亡

君有弔子及王朴齋詩

大招

賡罷涕沾襟三竺烟巒喜共尋西冷雨後暮潮長南屏
月落曉鐘沉李君磊落世無匹昂藏七尺鬚眉氣酒酣
不避武安侯落拓翻愁灞陵尉峭帆忽向桐廬去從征
萬里滇池路黃陵廟口鷓鴣飛諸葛壘邊猿狖度異姓
諸王誰最賢汾陽幕府銅柱邊已聞握髮禮縫掖會看
聚米畫山川尉陀旣繫呂嘉馘珠履雍容需上客羨君
綵筆動星辰揮毫坐使三苗格臨岐送罷渺天涯一路

鶯啼楊柳花坐中有客善長笛爲君更奏漁陽撾

青山莊歌爲徐聲服太守作

徐侯昔爲二千石衙齋下瞰蛟龍宅三載飽看蜃市樓
雙岐再秀漁陽麥解組歸來何太早灑淚車前諸父老
攜將五色丹崖石袖中磊落珠璣島君家別墅號青山
乃在九龍唐貢縹緲間烟波澹蕩芙蓉湖畫橋掩映茭
黃灣長松萬笏茅屋古白雲千疊柴門關中有一人兮
紺髮而朱顏餐沆瀣弄潺湲乘赤鯉招白鵬倚葛陂之
龍杖兮舞萊綵之斑斕昔我扁舟向於越看竹肩輿坐
林樾酒徒歷落兩薛生狂歌醉臥長橋月別來叢桂近

何如但言山巔水際添精廬科頭日讀南華篇盟手自
寫天竺書徐侯之樂樂只且四十不羨專城居君不見
隋苑離宮十有六荒臺滅沒眠黃犢又不見辟疆名園
竟何處舟人指點紛無據蘇堤邂逅送春光峭帆直欲
之炎方炎方山水信奇絕武夷九曲盤青蒼更到羅浮
最高頂七十二峰遙相望此中亦有蓬萊閣嵒嵒或與
東牟當君歸構亭山之陽安得畫手顧長康掃粉壁圖
滄浪南繪番禺東扶桑奇樹若木與桄榔徐侯招我來
栗里白飯青芻屬兒子野夫性懶怯奔走臥游但醉蘭
陵酒

題王西樵三桐小像歌

誰擘高麗雪蠶紙繪出三桐勢相倚直幹高撐綠玉峰
繁陰下覆烏皮兒紫髯白袷瑯琊兒隱囊如意方搢頤
揮手欲招朱鳳下髣髴已絙園客絲自言種此三十年
其一小者纔及肩邇來離立近百尺菟裘回首心悽然
愛汝十笏草堂靜篴奏塤吹一何盛牆東避世許我同
風雨蕭蕭抱琴聽

寄懷姚經三司理建寧

君家羣從高陽里過末封胡先後起黃門給事大中郎
火攻屈指長誇爾才名藉甚洛陽都康莊千里羨駒駉

相如車騎歸來盛，卻買扁舟到鏡湖。自荷長鑱探五泄，浣紗石上苔痕滅。千峰萬閣共銜盃，坐看秦望峰頭雪。同游者誰孫子荆，南州老子真狂生。曲阿太史好禪寂，雄談飛辯何縱橫。一旦存身在羅網，素交棄我如塵壤。男兒急難誰復憐，故人況隔螺江上。去年重到會稽山，有客新從九曲還。言君念我不暫忘，拔劍輟箸長三歎。嗚呼此意渺千古，已知堪悲越石父。子瞻磨蝎悔作人，馬遷貨殖思爲賈。羨爾平反有異聞，持平不肯用深文。卓犖還成鐵笛賦，褰帷並弔武夷君。往往從之不能去，離憂憑仗孫郎語。開軒話我再生緣，檣燭三條應至曙。

寄懷周伯衡憲副

憶昔渤海李學士上書侃侃論臧否南陽貴人爭欲殺
先帝優容得無死妻孥徒步東出關遠謫辰韓五千里
平原賓客散如烟交態從來類如此周侯夕下青瑣闥
一片真誠血相視短衣匹馬踐嚴霜蕭蕭夜渡盧龍水
姓名不遺關吏知但道先生舊弟子送上氍毹痛哭回
觀者歛歔行者止我住北平近三載李君累月書盈紙
方知古道未嘗亡國無君子將何倚黨人賴有賈長頭
董班高義垂青史世上盡如曹蜍李志輩不鳴不躍徒
爲耳思欲逢君一再拜冉冉征途改星紀困辱顛連安

足論故態狂奴老尚爾安得馬當山下風共看匡廬千尺水

送孫無言歸黃山歌

憶昔虞山錢尚書裹糧一月黃山居洞壑遙連天子障
巖扉舊是仙人廬白雲瀾漫似海水銀屋瓊樓或不如
松栢已迷秦漢世日月想見鴻濛初我讀紀游未終卷
移家便欲將雞犬一朝邂逅孫山人自言本是山中產
柴荆一別滯蕪城故國松筠空在眼越禽代馬思依依
欲歸不歸抱深赧今年還山計已就白石青谿齒堪漱
親串相迎不相識婚嫁皆從出門後五畝雖荒尚可耕

呼兒學種南山豆有時餘力及樵漁大男荷擔中男售
山人醉我金叵羅請予爲作黃山歌四海交游各有贈
傾箱倒笈何其多作者存亡半寥落黃山客子仍蹉跎
卜居狐疑詹尹笑我龜旣厭勞羲和荅云廣陵盛才彥
詞人墨客肩相摩倚棹徘徊未忍去離羣踽踽愁如何
我聞此語知其故迴觴卻勸山人住他日重尋戴安道
免使相思渺烟樹

羅篁菴先生生日歌

有序

豫章羅老夫子望峻龍門名高虎觀西京天祿
闡六籍之微言北面人宗接一峰之正學金滕

石室世傳永叔之文章壁潤珠圓

帝羨曲江之風度空馬羣於冀野收驂駟駃駟
之材振鷺羽於橋門賡玉瓚黃流之頌詵詵國
子方依絳帳於陽城藉藉公卿俄餞青門之疏
傳黑頭歸隱冠懸神武之門白社招尋家近柴
桑之里西山南浦長吟帝子之高樓白下長干
重啟謝公之別墅鑑湖一曲賀季真之軼事堪
誇繡幕雙鬟白太傅之風流再見茲值小春之
月方開六袞之筵詵授庚申親把洪厓之袂歷
周甲子誰知絳縣之年楚楚琳瑯盡是烏衣玉

樹紛紛鸞鶴銜來丹液瓊卮琬懷恩一顧願祝
三多當年立雪深慚吾道干城此日趨風幸接
南豐几杖爲公起舞還吟池上之篇聽我陳詞
竊附巴中之調云爾

昔我應詔來京師鹽車局促無人知司業夫子據臯比
學者宗爲韓退之河內薛公作祭酒講德之論中和詩
鴻都諸生何濟濟公侯胄子聽箴規絃歌饗射用古法
摩挲石鼓宣王碑是歲成均校多士公手予文稱絕奇
橋門觀者衆如堵一鼓遂奪千人麾京兆禮闈果再捷
硃珌爭價由波斯

章皇右文邁漢武網羅圖史陳尊彝戴憑談經累重席
匡鼎說詩爲解頤風度無如張九齡太平宰相非公誰
小子一官真拓落間關萬里雜羗氏當時執政頗驕刻
浮雲蔽日空爾爲師也見機獨明決拂衣高臥西山陞
扁舟時泛廣陵曲精廬況在秦淮湄扶風帳內笙歌部
花晨月夕常追隨西子湖邊侍函席丹靨綠髭橫軍持
自言已得旌陽訣招予同採匡岑芝今年再拜蕪城下
恰逢嵩嶽生申期登堂介壽者誰子康成弟子蘇瓌兒
富貴神仙安可兼鄰翁自是冰霜姿東華軟塵高十丈
何如五老峰下之茅茨聞公避喧往牛首籃輿共昇安

敢辭欲向茅君借仙馭召令飛瓊倚曲雙成吹

贈鄭汝器歌

莆田宋珏善八分書

近代八分復何有專家獨讓莆田叟作者紛紛祖唐隸
臃腫支離轉麤醜鄭君博物饒天姿書法道勁多離奇
老筆縱橫森劍戟尺幅光怪盤蛟螭大書徑尺懸巖窟
髣髴再見嶧山碑家藏圖書半秦漢陳倉石鼓宣王詩
岫嶠傳疑夏王禹之杲篆刻丞相斯縹緗卷帙各精好
巖搜壑剔將無遺我來焚香肆展閱神游三代觀鼎彝
主人愛客出斗酒高齋日午桐陰移況復髯兄善豪飲
醉揮三百金屈卮君從壁上觀人醉獨踞匡牀作奇字

潑墨淋漓四座驚
咫尺蒼茫風雨至
昔我持節隴首經
唐洗中郎郡閣銘
會將什襲稱雙絕
置向浮嵐暖翠亭

余家藏黃大慶山水曰
浮嵐暖翠閣因以名亭

香山讌集詩有序

歲在丁未六月乙酉將由建業言反吳門懷吾
士以登樓興悲王榮蒞大邦而製錦有美馮君
慕懷縣之風栽花譽滿篤并州之誼投轄情深
喜熟客之何來無譏襍襪快嘉賓之畢集寧惜
尊罍觀號香山栢栢識青牛之氣橋環碧水笑
蓉儼白鷺之洲爰命行廚釣金鱗而作鱸葦微

童子倚玉砌以吹笙幕展青油宛渠渠之夏屋
卮分翠蓋代曲曲之流觴正爾殷雷天外欲來
山雨俄焉明月樽前忽散城霞左右涼颼不惜
平頭羽扇浮沉朱李差宜散髮匡牀樹扶疎而
黃鳥來歌波潏潏而白鷗成隊統統羯鼓隔素
幔以催花點點流螢伴銀燈而送客昔者南皮
飛蓋因裁公讌之詩洎乎河朔傳盃厥有良辰
之頌以主人之高韻如斯況景物之流連若此
可無篇什以紀歲時羨今夕之陶然甘從金谷
園中之罰倘他年之至止竊疑元都觀裏之桃

云爾同游者陳幼木孝廉湯旌三進士柳公韓
馬寅公崔季通王君貺茂才序其事者萊陽宋
琬也

炎蒸偶過投金瀨火雲突兀如車蓋主人愛客不知疲
臨流置酒成高會芙蕖花葉正田田習習香風滿衣帶
楚姬十五曉奩開越女三千明鏡外南山之下殷其雷
揮汗不飲愁尊罍須臾赤城暮霞起素娥流影無氛埃
珠璣零落白鷺喜管絃嘈雜元蟬哀銀漏沉沉客竟醉
玉山屹屹何由頽康成弟子陪游衍來朝洗瓊重開宴
是時西北天如茶驚見涼飈掃飛電神女山來避瀧壇

風霆咫尺陰晴變角觚交陳父老觀街衢燈火兒童忤
井梧旦夕報秋聲扁舟欲發闌闔城握手相看那忍別
更捲荷柄作兕觥君家夾河善爲政雙鳬佇待朝神京
卻憐道士無鵝換素壁猶堪書姓名

佟中丞滙白僻園觀姚伯右畫梅歌

南國梅花數袁墓絳雪瓊枝千萬樹秣陵城中吉祥寺
古幹離奇世無二游人如蠓坐其下車馬笙歌到花謝
我來步履長千里荷葉田田正初夏驚看素壁掃寒枝
霜華綠萼紛相亞禿梢拂雲半已枯蛟龍屈曲怒且癭
粉黛肯教巢燕污輕黃欲上游蜂鬚畫手曾聞楊補之

近代無過關九思姚生自是餐霞客酒酣潑墨方淋漓
亭亭斜影臨春水姑射仙人弄珠蕊穠李夭桃空自妍
一時頰首稱羣婢尤物從來貴棲託多君寫向平津閣
孤亭面面碧瑯玕池光交映青田鶴主人醉客出新荔
絲竹東山恣燕游據牀三弄桓伊笛不必重尋孫楚樓
送王古直之大名爲周起三太守書記

王郎家在錢塘郭楊柳臨湖起高閣門外偏多載酒人
滑稽雄談恣歡謔一朝結束遠行邁匹馬蕭蕭向河朔
銜杯借問所從誰天雄太守開蓮幕勸君滿飲緩離憂
大缶山中我舊游霸跡銷沉五鹿在人烟稠疊二漳流

閨左頻年苦征稅南箕北斗困誅求來何暮哉二千石
蒼生待爾抒良籌黃梅日夜西冷雨渺渺孤帆隔烟樹
懷古應過白馬津揮鞭何處黎陽渡此中詞客有盧桄
松楸零落穿狐兔式廬表墓主人恩苗裔若在尋遺賦
未須灑淚向臨岐予亦依劉舊有期翦燭定當蟋蟀夜
泛月或在鷓鴣陂美酒從來數桑落十千一醉烏容辭
郡人交說岑公孝薦達敢誇魏無知

寄姚六康

學者讀書須讀史坐窮理亂知臧否但愁紙價洛陽高
空使臨淵羨寒士朱門細帙競裝潢獵色漁聲安用此

須臾散失隨雲烟補袍覆醬徒爲耳兩京監板頗粗略
數行以後丹鉛止近來劖劂數毛家校讎惜未精蒐薈
兼載徒誇費兩牛愆訛誰復分三豕南梁北齊編更陋
譬如嘉穀紛糠粃乖謬相承千百年無人筆削存公是
姜生雅負春秋癖閉戶覃思卻車軌上溯馬班下沈范
歎息歐陽觀止矣刪繁滌穢匠心苦甫田有畔紛絲理
蹇驢捆束走長安詞林動色公卿喜何由薦達明光宮
卻難流布咸陽市丹陽令尹綰綬初誓將薄俸謀經始
重構蕭家文選樓爰從兩史爲嚆矢吾儕豈乏桓君山
高臺九仞需層累或曰姚侯一何迂催科不肯施鞭撻

臥閣惟知學蠹魚，慨塵那得肥妻子。既無公府之嚴機，又非水衡錢穀比。胡爲乎孜孜矻矻窮年而不已？姚侯大笑謝時人，吾亦不知其所以。但言樂此不爲疲，有書不讀何如燬？我慕姚侯常下拜，欲往從之渺烟水。摩挲雙眼待書成，書成早寄青湖鯉。

長歌贈陳其年

瑯琊兄弟耽詞賦，法曹年少來瓜步。東閣梅花召賓客，閣外常盈幾雙屐。座中最愛陽羨生，一榻高懸待徐孺。考功瀟灑善長調，屈指推君誇絕巧。武塘學士亟稱賞，共把君文問君貌。扁舟暫繫瓊花臺，蒹葭歷亂芙蓉開。

半刺懷中猶未出心知是君美且憇輕棹容與泛秋水
狂歌氣欲吞長淮君家冠蓋滿京洛三十年來莽蕭索
青緇奕葉擅雕龍白眼何人識孤鶻屯田員外曉風詞
秦川公子登樓作丹陽少府頗好事搜剔蒼巖洗瘞鶴
北固城頭聊共吟中泠泉水還堪酌朔風千里撲行車
歎息征人霜鬢華醉中莫折隋堤柳來歲同看鄧尉花

寄趙雍客

憶昔結交嚴給事綵筆懣陵千象緯作者七人余其一
汎愛兼收爛羊胃論文雅欲法周秦作賦相期宗漢魏
坐中稱述及吾子精銳偏師使人畏不數同邑江東生

羅隱絕勝君家渭南尉

趙毅

湖上飄零喜見君樽酒班荆慙

素聞晚鐘共踏南屏月曉色遙看天目雲醉後爲余開
篋笥琅玕奇字青霞文戛擊鐘鏞還大雅竟陵餘子徒
紛紛風驅電邁鬼神泣豈惟旗鼓張吾軍旅雁沙鷗無
定向菰城臥病歎離羣藥裹沉綿疎玉琰枕藉君詩常
在眼由來七發逾良醫二豎奔逃去如剗雙鳬共羨使
君來手板要章綬初綰才名藉甚尹翁歸輿論歡騰鄭
子產料得栽花滿路衢況復鶯聲方覲睨澱湖東上路
非遙一葦曾聞不崇朝相思相望轉愁絕扁舟欲往羞
陽鱉年來已厭鱸魚膾會須歸問故山樵尺書若訪張

安雅堂未刻稿卷一
融屋白鶴江頭有暮潮

題沈友聖虎邱夜宴圖

君不見宏農太守皇甫規折節下士如渴飢尺書遣謝
趙元叔高風千載難攀追漢陽顧公真御史青眼能交
天下士繡衣按部五茸城驄馬將行且復止騎旄前導
吏人趨使君命駕東城隅造門執轡候良久沈生高枕
臥菰蘆一笑登堂但長揖觀者如山繞牆立交情真見
古人風安問乘車與戴笠扁舟相送惜離羣生公石上
共論文騶馭停車立花外山僧秉燭向宵分快事驚傳
作佳話一時逸興堪圖畫鬚眉逼肖衣冠殊寫生疑是

將軍霸瀟灑何須獬豸冠捫蘿穿葛上層巒祭酒先生
橫塵尾月明清嘯共馮闌方聞綵鷁沔川回何益長沙
鵬鳥災迴車自下羊曇淚白馬應需范式來我見此圖
三歎息史魚不作悲遺直婁東幸有典型存欲往從之
無羽翼沈生痛哭知音稀三徑蕭然獨掩扉請看世上
軒車客只重黃金輕布衣

修竹篇爲筠士上人作

茸城五月黃梅初簷溜如瀑三尺餘古云避暑如避寇
炎蒸卑溼愁所如翠竹檀欒出紅壁鶯聲歷亂高僧居
便策青簾招素友興來不復勞肩輿少年釋子喜迎客

灑除苔徑開精廬筆底烟雲北苑法架上卷軸先秦書
繞屋琅玕青萬个脩然直上凌空虛坐愛清光還復臥
繩牀無足施簾條一枕涼颼來北牖睡起盤餐復何有
鬪將新笋伴伊蒲已放龍孫出林藪羨爾丰神迥出羣
此君楚楚真堪友卻嫌十笏無餘地渭川恨不栽千畝
剝啄誰人共往還祇應許我支離叟禪門閒寂萬緣空
桑下一宿如飛鴻寓情於物恐爲累況乃色相存胸中
支公好鶴兼好馬嗟君此意將無同三問支頤笑不荅
少焉月出青林東清磬數聲收衆籟空塔肅肅聞清風
相送溪橋聊佇立回看烟霧方濛濛

贈戴葭澗

錢唐布衣老謝彬繪事遠過曹將軍弟子誰人擅絕技
戴生磊落超人羣青出於藍語誠有一時月旦爭傳聞
吾友瑯琊王吏部昔年邂逅西泠潯示我長齋繡佛圖
云是君家妙手之所譜丰骨稜稜瘦且清果爾傳神在
阿堵想見解衣盤礴時耳若無聞目無覩聞君僑遇邗
江邊三載頻廻訪戴船非關興盡卻歸去愛而不見緣
何慳扁舟暫繫隋堤柳幸得相逢執君手研光片幅寫
鬚眉媿我朱顏已衰醜須臾觀者如堵牆僕隸舟師交
頰首形骸土木幻耶真纍纍一似東門狗我有新亭號

二鄉菟裘終老遂徜徉煩君繪出華胥境更寫糟邱日月長邀二古人爲伴侶漆園傲吏狂高陽宛陵先生肯同往補入王郎共一處

竹罌草堂歌

膠城朱松鄰白門濮仲謙皆以竹器擅名

君不見練川朱生稱絕能昆刀善刻琅玕青仙翁對奕辨毫髮美人徙倚何娉婷石壁巉巖入烟霧澗水松風似可聽鏤玉雕犀安足誇玻瓈可碎犧樽腥白門濮生亦其亞大朴不斷開新硎虬鬚削盡見龍蛻輪囷蟠屈鳴夷形匠心奇創古無有區區荷插羞劉伶妙製流傳真者少何侯得之爲異寶大書深刻作堂額客至登堂

多不曉我來問名請縱觀錦筍纔開稱絕倒黃倅蒸栗
纈且堅潤比瓊琚兼肉好何侯啖我燒羊胛華髮臨風
除白哈皆列唐昌觀裡花欄餘甫里先生鳴美酒元從
白墮畱新筍更得青州法南人不慣北人歡繩牀坐聽
糟牀壓君不見蔡邕笛千年人去亭名柯詎若龍鐘古
節大如斗真堪一日十摩挲銅盤絳燭朱顏酖升君之
堂爲君歌年來已厭烏程釀客中十斛須相餉沙棠樹
下牡丹叢蓓蕾計日應全放殷勤欲倩好風吹痛飲還
期明月上預勅雙童洗竹罌待余醉臥青絲障

贈馬南宮叅戎

君昔銜命赴臨洮少年意氣何雄豪狐白之裘秦復陶
袴韓昧首烏孫刀雪深草淺牽旅獒手格猛獸如童羔
綠熊赤豹遠遁逃生取蒼兕拔其鼉屯田蕪沒愁耘薶
黃砂磧裡飛蓬蒿金城戍卒飢嗷嗷翁孫方略徒煩勞
安西都護醉葡萄誅求絡繹窮秋毫旋從丞相征哀牢
五月渡瀘入不毛苴蘭城下血戰鏖蠶叢鐵馬隨猿猱
李廣數奇功則高猿臂不得擁旌旄長嘯歸來脫錦袍
黃公酒鑪換濁醪鱸魚三寸尊可芼安能俯仰同桔槔
美人環珮逢江臯感君一曲求鳳操畫眉筆染青螺膏
鸛鶴紫硯箋薛濤調絲未央參翔翔玉臺新咏鏗雲璈

溫柔有鄉堪醅醕何勞錦字貽寶滔灞陵醉尉空嘈嘈
吳鉤夜作蛟龍號孫盧餘孽阻風颺天威赫怒集征
艘樓船十萬聲喧囂何人爲薦公孫敖熬弧重繡解弓
綬洗清瘴海爲城壕雲臺圖畫鄂與褒道傍加鼓驚兒
曹丈夫窮達信所遭

東園歌爲王烟客先生作

時公子藻儒令孫茂京同舉進士

海內於今推甲第太原家世誰能儷相國當年相定陵
百年魚水君臣契伯仲堪居伊呂間昇平再見唐虞際
池上鵷雛五色文世掌絲綸參內制相國文孫有奉常
官秩清華尚璽郎由來獨抱烟霞癖早賦初衣笠澤旁

尚有平泉餘薜荔更開別業闢池塘斜置小橋通鳥路
直從雕檻繫漁榔韓陵一片石堪友窈窕崕岬出林藪
鑿險搜奇遍洞庭靈威丈人復何有手種青藤松際懸
蛟瘦龍蟠紋左紐紫幔交垂白鷺眠綠陰羃歷蒼颺走
君不見會稽內史右將軍千載人傳修禊文又不見藍
田主人王給事摩詰前身畫師是逸少諸郎尤絕倫衣
冠累葉何說說文采風流兼福慧奉常得之爲一身游
戲丹青過北宋莊嚴篆籀學先秦絳雪堂前珠作樹青
羊車裏壁爲人綵筆憑陵掣雷電承恩同賜紅綾宴家
有名駒羨阿戎人如國寶誇王儉上苑驂驪風骨殊北

堂龍馬精神健連鑣共向曲江游卽看視草蓬萊殿東
園紅藥正芳芬千樹鶯聲出亂雲鷺嶺僧供鄭國笏虎
邱松老令公墳叨陪杖屨娛清晝坐遣壺觴到夜分羨
翁久擅五湖長更署新銜萬石君

三歎

大江六月揚舲過蜻蜓之舟甌中坐廚人揮汗進羹糜
金盞玉膾誰能那況復蚊雷攪夜眠曲肱卻羨黃頭臥
一葉梧桐捲地來千羣鐵馬中宵作忽似重圍報解嚴
此事大奇良足賀朱鳥奠爾一杯酒瓜期及矣行當速
君不見穰侯門前車馬喧代者何人乃張祿

秋風淅淅廣陵樹越布單衣喜初御新涼恰似故人來
殘暑渾如酷吏去夜嫌背冷捲桃笙曉撼童眠煨薯蕷
祝融乘龍憎容與赫怒餘威不少恕陰陽愆伏古所無
月今天官渺難據老夫笑臥篷窗間物極則返天非慳
君不見朱門炙手手可熱一朝失勢成冰山

黃河濤浪山龍從溯流五日皆南風長年三老齊奮力
舟如飛鷁人如熊正爾發狂呼大白檣烏捩尾俄復東
百丈安能勝萬斛汶流在眼難爲通統統伐鼓北船發
估客笑語盤渦中人生快意豈能屢哀樂中分莽回互
君不見青門疏廣早懸車得時且避賢者路

晨星歎

先帝四載策進士制科再舉由中旨偕對舍元三百人
於今落落晨星耳岳侯早啟山公事臣心一片寒如水
東南竹箭會稽良谷侯一顧無遺美斥鴳因風附鵬鶚
官系行臺未爲薄何期同室產鴟梟告密投章如戲謔
義輪那復照孤葵赫怒天威遭束縛羅織經中成貝
錦例竟門前愁鼎鑊自從繫械兩經春面目鰲瘦疑非
人晝苦喧囂夜愁寂幽風習習吹青燐一朝谷侯亦來
此不敢詳問防者嗔竊聞構譏亦其族魑魅相思良有
因岳侯胡爲暫遷斥一眚倏爾嗟同厄大火方中氣鬱

蒸破屋危簷何逼迭愁雨兼旬陸海傾牀下水流聲汴
汴甌產游魚竈絕烟枕簟生衣足無屐室邇人遐限沮
洳跬步何由吐肝鬲古牆驟塌無人封谷也暫得相過
從裸袒圍碁發狂嘯共飽鮭菜傳殮饗寒驢借得不復
轡同訪岳侯臨暮春斯須立談驚且悸渾疑絕域忽重
逢曲江昔日同游衍走馬聯鑣雅相善威鳳摧頽在雞
筍土作匡牀淚洗面韎韜老兵立我側譯罷相看三歎
息夜如何其夜已闌起視晨星淚霑臆

苦雨歎

昔年癸巳長安居冥冥大雨十旬餘彰義門中駕筏渡

千家百室無完廬今年癸卯在西曹炎蒸翳東方爵陶
銀河倒注日復來俄頃牀足翻波濤天道周廻十年始
又看禾黍頭生耳沮洳壅巷溝渠渚百堵高墉一時圯
我居舊隸執金吾畫棟雖存牆壁無疾雷震電撼窗牖
珠傾箭激侵肌膚燒燭不燃蚊蚋出同惡實繁蚤與蝨
仇讎滿眼驅不得任其嚙嚙心如失吁嗟乎昔也高臥
華堂邊桃笙霧縠常晏眠今也何辜陷虎吻泥首塗足
誰爲憐桁無乾衣釜無粟繡澁青苔連桎梏淚痕隨雨
滴成漚中夜吞聲共僮僕閭闔遙遙不可呼帝饗鈞天
其醉乎如聞下土銜冤者何事頻投玉女壺

窮交行簡錢玉章館卿

絕交之論詎堪讀讀至窮交長痛哭良友誰憐任彥昇
奇文遂廣朱公叔更有交情視衡纈雨覆雲翻紛在目
瞿塘非險孟門平附羶趨熱相追逐昔余謬忝尚書郎
五侯七貴爭推轂一旦失身罟網蒙垂而入愁餒粥
呼天不聞天蓋高卿相朱扉金作屋閭者嗔目唾且叱
老僕屢穿空匍匐故人佩劍長安來欲告之急心徘徊
蹙然足音疑夢想相與拭淚嗟形骸愁中動息每相曉
旦夕款門門卽開七尺男兒重意氣一生一死書廷尉
多君不棄蒯與管況吾聲名衆所諱知己繇來勝感恩

市兒暮寂朝復喧
酌酒重呼孝標起
到漑兄弟何足論
雷霆引

飛廉趨共工
怒火作鞭金爲斧
靈夔之皮以蒙鼓
白虎爲御兮弗肯下
擊其儕伍
嘖嘖野人言前邨
斃黃牯東家老木半
已枯摧之戕之有何
武封狼蝮蛇滿郊邑
張吻殺人方跋扈
雷兮雷兮亡其柁
胡爲貫爾若無覩西
山落日濛汜邊
須臾返照聲寂然
我欲因之問其故
無奈咸久上天

將進酒

酒乃愁之醫
奏功逾扁鵲
陋儒何齷齪
譏之曰狂藥
鵝

笙象管錦瓊瑜座無麴生慘不樂少年努力傾金罍莫
向桓山營石槨古來達者不願醒玉山一倒天冥冥白
日苦短繼以燭舉杯大笑匏瓜星醉鄉主人昨有書中
山招手許同居我攜何物往樂土紫螭之螯江瑤柱

市驢行

同伯寺前黃紙下黔首不得畜匹馬輸官者後罪無赦
騾駟驢駟棄中野走馬糞田史有書房星天駟光模糊
柴車磷磷驚噦噦負輓者誰大宛駒五陵富兒顧厮養
蹇驢價出龍媒上素絲作鞭金絡頭驕嘶奮鬣行長楸

行路難

少年不耕復不畝行旅我獵買我漁晝探赤丸乘白馬
杜陵韋曲公然居司隸校尉不敢問公孫丞相徒嗟吁
君不見封爵由來有捷徑告密一紙牢修書錦衣高蓋
驚里閭

身不必賢良書名不必茂才舉便飽五經豈若工三
語鄉里小兒車上舞大字新銜謁府主三年前在廊下
趨白頭老儒徒踽踽漢家公卿半刀筆平陽之後有丙
吉家家少牢祀鄼侯有兒莫讀天人策駟馬銀鞍金作
魚何足道哉二千石

放歌行贈吳錦雯孝廉

大江東流何湯湯有客思歸望扶桑登樓慘澹意不樂
忽聞故人來遠方麻衣如雪手苴杖相顧無色但旁皇
憶昔扁舟初入越感君意氣方飛揚余兄一日進七士
崑崙縣圖皆琳瑯中有一人年最少狀貌乃類張子房
見之口呿面爲赭心知是君未敢詳退酌深觚用相賀
彼髯而紫真乘黃月明共泛西子湖水葉乍脫天微霜
縱談高視八極外鬚眉一一森開張一朝塵沙塞天地
黃河以北尸爲僵憐余薄祜遭奇禍骨肉摧裂天親戕
雞斯徒跣奔厥訃不死賴汝能扶將閭閻城外揮淚別
海燕江鴻兩茫茫子之慈闈亦已沒軼軻與我輒相當

羣盜猶知憐李涉世人何欲殺嵇康生逢坎壈難得志
鳳凰在笥驥服箱忼慷悲歌衆所諱壯懷歷亂如帆檣
君不見會稽盛孝章平生鬱鬱懷憂傷又不見東吳虞
仲翔青蠅作弔空悲涼男兒但當讀書擊劍飲醇酒生
繫粵王頸死葬要離旁不爾亦將日與狗屠游彎弓躍
馬狐兔場或乘雲氣聊徜徉下視鄉里小兒如蜩蟴

貞媛競烈篇

三晉由來多義媛津吏之女弓工妻不惜捐軀脫父難
高風千古難攀躋河東侯氏家素封森森二子如游龍
鄉里咸推萬石君閨門之內何雍容大婦能條桑少婦

職中廚婉彼諸小姑年各十五餘綺衣綦履性所適明
璫不羨青珊瑚女史幼嫻張壯武文雅還過班婕妤夜
織流黃不下堂阿母顧之顏相莊春風高綰珍珠箔乳
燕交棲文杏梁一朝冀北起風塵戈鋌蔽日來黃巾軫
前人頭後婦女大搜里巷羅金銀盡室吞聲哭掩面阿
母從容色不變手指寒泉顧兩男以井爲棺汝我殮諸
婦躍入諸姑隨牽衣連袂如魚貫更有婢妾三五人含
笑相將赴幽竈生常侍側死當媵皓齒明眸托修綆簾
幙三秋錦瑟寒轆轤千尺芙蓉冷願將碧水照丹心恥
爲黃沙築青塚韓侯白馬從東來停車再拜爲徘徊輪

軒使者報

天子千年再見青陵臺
吁嗟乎生民不幸逢天寶
家室此離不自保
多少懸金拖玉人
左建高牙右羽葆
塌翼垂頭安足論
終當汨沒如秋草
誰爲劉向操彤管
似此幽貞世所罕
人生百年會有盡
茫茫天地孰修短
老夫作歌情默默
唾壺擊缺悲填臆
君不見豫讓橋邊日月昏
坐令壯士無顏色

郭輝竹太夫人壽

君不見東漢郭林宗
辭祿躬耕養其母
又不見東晉陶士行
高堂翦髮延佳友
古之英雄磊落人
壺德千秋垂

不朽余也平生風雨交郭氏諸郎堪白首丹穴驚誇鸞
驚毛渥注真見麒麟走季布千金一諾輕相如四壁貧
何有門外偏多車馬迹論文往往橫星斗供客惟餘燦
畔雞呼兒夜翦園中韭甲申之歲起龍蛇雀鼠豺狼壞
我家翟公賓客半零落鵲鶴原上昏風沙肝膽一朝成
楚越揮戈奮臂磨其牙諸郎意氣挺身出旁人動色爲
咨嗟陰霾見日事終雪阿母聞之七箸加瑣尾歸來經
蕩析再得登堂增感激伊余深愧稚珪文多君未捧毛
生檄絳帳春風並授經前列生徒後長筩闥闢之內有
嚴師至今七十猶親績初度欣逢夢月辰清秋八月場

初滌開筵詎羨紫駝峯充盤共列紅蕖酌歎聞賓客四
方至徒御盈門馬在櫪白飯青芻饜所需咄嗟而具忘
勤劬綵衣爛熳拜且舞兒孫宴笑吹笙竽我聞西方有
美曰戴勝金支翠羽誠虛無又聞鳳凰之子名雛雛飲
啄丹泉棲碧梧豈如此母令名兼壽考青精不飯顏色
腴何以進之綠玉鳩又何觴之紫霞曠鄉國咸宗敬姜
教多士欣從叔度游郭生郭生百不憂高材豈合終田
疇明年上書見

天子歸來上壽陳嘉羞預勅中廚具雞黍重醉東臯花
萼樓

張幼量古劍歌

有客傳書滄海東，貽我寶劍光熊熊。
龍鱗鳳脊不復識，開篋蜿蜒生白虹。
張君今之魏公子，好古懷奇性所止。
急難偏憐趙勝危，虛恭能使侯嬴死。
一朝刷地出湛盧，雌雄再向豐城起。
拭以華陰山下之紫泥，濯以浩汗東流大江水。
水鷗鷁寒光不可藏，星辰夜閉珊瑚區。
銳頭奚兒虬作鬚，三尺錦囊常負趨。
攜舞尊前聊娛客，空堂似有蛟龍呼。
五陵貴人欲相奪，君執不可顏色沮。
酒酣顧余恒促膝，笑指蒼天凌皎日。
何由邂逅有心人，脫手雙鐔佩其一。
戈鋌沸地箭滿眼，未肯須臾暫相失。
故人臥

病久離羣豈意寒暄到白雲參差宛帶芙蓉影滅沒還
疑蝌蚪文冰雪交情有如此始知世上空紛紛自昔神
物稱難遇春日蒼茫隔烟樹報君遙盼塞鴻飛挂壁蕭
蕭走風雨

雪夜蘋園聽何山人彈琴歌

殘雪戔戔照金罍主人置酒臨高臺座中有客操綠綺
使我徒御皆心哀寒風蕭颯空堂裏一曲未終棲鴉起
忽疑空山雷雨過倒挂飛流聲齒齒又如班馬之羣鳴
千騎萬騎行復止山人本自雍門客長裾恥向王侯宅
結友偏多俠少場貧來獨有丹青癖醉時攜得虎頭筆

滿壁雲烟峯削戍生綃高捲洞庭雲綵毫孤映蓬萊日
絲桐筆墨各有神琴理真從圖繪出水仙海上霧濛濛
廣陵絕調隨春風弦際何由識今古胸無邱壑難爲工
伊余自歎嬰塵鞅五嶽空懷何日往煩君爲鼓一再行
能令宗炳羣山響趙郎善手寫金巖更爲變徵淚霑衣
明月疎鐘兩搖落滿地清霜鴻雁飛

春日曹侍御秋岳齋中社集

燕趙以來多豪俠荆卿一去田光歿平原高冢空嶙峋
買絲難繡琅玕骨當代才人誰第一曹侯雅與陳思匹
輦下爭傳諫獵書雄文不數枚生七伯仲之間兩司馬

建安而後風斯下四座況多江海人悲歌旁若無人者
清廟朱弦久寂寥翻因離亂存風雅對客長吟金叵羅
吳歛齊謳紛浩歌且復凭闌望八荒西軒燭滅飛鴻過
拙毫握槩雲霞起珠璣錯落含宮徵醉後堪思白氍巾
狂來欲碎烏皮几余也棲遲燕市中蹇驢蹙蹙忘春風
羊陟門前未敢哭寧戚轅下誰爲客祇今早夜懷苦心
所嗟落落無知音感君意氣如霜雪論交杵臼情何深
參篲柱急杯數傾起視銀河低玉繩螺贏螟蛉之二蟲
仰天笑爾徒營營

送吳孟甫歸閩中

燕山四月鶯亂飛吳郎倚棹將南歸
津亭楊柳花已落攀條折贈心依依
政值王師歌采薇旌旗耀日戈鋌輝
笳鼓喧闐塞路衢緩君行李開柴扉
吳郎氣概真足慕風格依然黃叔度
常將白眼傲王公獨以深心托毫素
裋褐相逢杵臼邊定交片語抒情慤
十日不見輒相思蹇驢不跨多徒步
丙夜論文燭無跋坐看殘月東南吐
豫知此別已銷魂瀕行爲寫江淹賦
聞道歐羅道已通蠺居葶布來都中
我已倦游如病鳥君今何事逐飛蓬
行過庾嶺定相憶若到臨邛誰繆恭
吳郎莫辭醉爲君歌一曲借問黃金臺
何如武夷谷武夷山水幽且深百

尺簣簪四時綠櫻欄青青荔子丹歸時應惜枇杷熟況
復扁舟載莫愁詎羨明珠三十斛驅駒在門酒在壺客
子銜卮吟鷓鴣恨余未得一相從南渡沅湘問五湖鷄
鵠鐘鼓非所樂長安索米胡爲乎南飛時有征鴻翼楓
葉殷時憶我無

從軍行送王玉門之大梁

有客有客髯而紫左挾秦弓右吳矢自言家本關中豪
黃金散盡來江汴年來倦上仲宣樓裹糧且訪侯嬴里
腰間匕首徐夫人河上荒祠魏公子懸知弔古有深愁
慷慨登車不可止自從盜決黃河奔大梁未有千家村

烽火但增新戰壘塵沙非復古夷門短衣聊向將軍幕
長劍終酬國士恩落日驅車臨廣武春風試馬出轅轅
丈夫佩印乃恒事安能鬱鬱老邱樊王郎顧我深歎息
一見歡如舊相識此行不但爲封侯人生貴在抒胸臆
江上楊花白雪飛梁園芳草青袍色盾鼻猶堪試綵毫
鶯聲聊爲停珠勒醉後狂歌氣若雲軍中教戰容如墨
春風拂地車班班起看明月隨刀鏤平臺賓客久零落
至今汴水空潺湲憐予偃蹇風塵際年來磬折凋朱顏
已知苦被雕蟲誤強弩欲挽不可關待爾他年分虎竹
相從射雁終南山

長歌寄懷姜如須

甲寅之歲汝降初我生汝後七月餘竹馬春風事遊戲
雞犬暮歸同一閭君家黃門早射策盛年謁帝承明廬
有兒顏色嬌勝雪珠襦繡祿青羊車予時抱持著鄰上
許以弱女充掃除是時兩姓雁行敵絳華朱萼相扶疎
操觚握槧衆所羨汝南潁上名非虛城東茆屋先人築
清渠一道穿喬木同輩相攜五六人縹緗羅列開籤軸
冬菁作飯飽饗殮布衾共臥忘休沐自是轅駒行步遲
卻看鵬鷖拚飛速當時天步日艱難戎馬交馳疆圉蹙
盜賊縱橫賈誼哀國是紛紜蔡邕逐鉤黨方嚴誰見收

多君置橐供餽粥一朝變起塵沙飛老親白首同日歸
骨肉摧殘那忍道餘生孤子將疇依渡江浮海無消息
飄泊不辭寒與飢予歸已類遼城鶴十人九人存者稀
行經舊巷不復識高臺傾圯無門扉旅穀生庭故井塌
鴟鴞晝嘯狐狸肥有客傳書知汝在但言北望常霑衣
攜家流落棲江左出處憐予無一可舊業雖餘數頃田
犁鋤欲把誰能那況復陳畱風俗衰青兕元熊啼向我
應詔公車解褐衣勉尋升斗羞卑瑣兔絲未附女蘿枝
明珠已碎珊瑚顛三十餘年盡苦辛回頭萬事傷心夥
君有慈闈我母同老人苦欲思山東男呻女吟歸不得

到今兄弟猶飄蓬給諫桐鄉有遺澤季也常依臯伯通
展轉崎嶇二千里蓄甘負米心慙慙伯兮踰躑遭戕賊
黃鳥之詩傷我衷鵲鴿高冢鬱相望昔何榮盛今何窮
古人四十稱強仕爾我年猶非暮齒形骸老醜青鏡中
髣髴毛鑷盡還復起語云憂患能傷人孝章詎有長年理
江上春風變柳條尺書忽墜來雙鯉上言別後長相思
長跼開緘淚盈紙扁舟欲來蛟怒號采采芙蓉隔江水
君不見周周之禽最微細羽翼相銜不相棄又不見交
讓之木柯葉同南枝歲蕤北枝瘁少年意氣輕雲霄中
道飄零共憔悴吳門市卒避人知灞上將軍逢尉醉富

貴升沉安足論要當努力千秋事歌罷空堂驟雨來燈
火青熒愁不寐

贈陳卜五副戎

楊柳垂垂新雨過烏几匡牀客獨臥襄陽大舸挂帆來
病中得見陳驚座陳侯意氣干青雲學書擊劍遠從軍
慷慨彌慕魯連子笑傲不屑春申君裘帶雍容真雅度
橫槊征鞍馳露布少年走馬驕驪陂醉墨淋漓鸚鵡賦
我輩論交果有神相視而笑明江濱抒心寫意在傾蓋
旁人不謂相知新近日人情如掣電蕭朱得路雷陳賤
豈無肝膽生死言須臾卻逐黃金變君言及此歎縱橫

湛虛如雪腰間鳴握手危檣聊延佇仰看白日浮雲征
關吏蕭條遭束縛逢人不敢稱酬酢元貍豎毛立我旁
此文愁心爲稍卻畫鵲飛飛指石頭佳期相約蘆花秋
好將一片秦淮月畱醉元龍百尺樓

寄呈其武宗兄太史

昔日漢庭開五柞冠蓋輝煌滿京洛章臺走馬多少年
春風十里懸珠箔我家太史對楓宸明光射策第二人
天子臨軒勞主父渥洼再見生麒麟今之太宰齊被遇
方軌連鑣起天路賦詩屢和栢梁篇視草時披溫室樹
余時裋褐客長安遙瞻丰采彈其冠詎意乾坤有變遷

泰山爲谷滄溟乾威鳳神龍在草澤幽居不救蒼生厄
藏書已足富名山何日徵車來東帛罔伯居然世父行
往與先子同爲郎圖書手澤宛如昨使我再拜涕浪浪
西射堂前春草碧開緘三復明相憶小弟何當千里駒
哲兄不惜連城璧昨日燕臺尺素勞惠連今在白雲曹
無由共聚長千里明月清樽照綵毫

庚寅臘月讀子美同谷七歌效其體以咏哀

歲在攝提月在酉天之生我何弗偶日月駸駸東逝波
萬事傷心無不有悔將詞賦謁公卿慘對枌楊呼父母
嗚呼一歌兮歌難終孤兒東望心慙慙

遺孤遺孤真可哀兩人早已歸黃埃壯者生存少者死
九原可作心當摧況復年來罣羅網鵲鴿之咏良悲哉
嗚呼二歌兮歌再咽衣袖沈瀾淚成血

有妹有妹同胞生薄命亦復如諸兄良人弱肉困豺虎
男呻女吟八九齡憶在里門常病臥燃鬚炊藥傷我情
嗚呼三歌兮歌三拍急難惜汝爲巾幗

有姪有姪珣之孤覆巢何幸畱其雛有書驕穉不肯讀
硤田蕪蔓愁官租汝伯忍死望汝立婚娶未畢懷區區
嗚呼四歌兮歌更苦我弟形骸尚淺土

有女有女催我老門楣何似生男好古人女史有良箴

作婦須嫺栗與棗而翁書來報舉孫愁中暫得閒懷抱
嗚呼五歌兮涕漣洳縱學緹縈難上書

朔風淒兮白日昏深山絕壑啼哀猿天門峩嵒萬餘里
巫陽披髮乘文黿我欲因之竊有訴元熊守關聲還吞
嗚呼六歌兮歌曲長羲和爲我迴頽陽

男兒墜地今年三十七垂老低頭對刀筆生死方知管
鮑交婚姻何有金張室浮生未敢問蒼龜前路蒼茫黯
如漆嗚呼七歌兮心轉悸永歎還防噉獄吏

張舉之再直西省傷余在繫之久賦詩志感

君在白雲曹我坐黃沙繫送我入獄門呼天共垂涕男

兒患難在倉卒叩人門戶遭其噫君也慷慨念疇昔俄頃經營到纖細自解重裘覆我身漿酒霍肉紛相繼夜臥不復憂桁楊低頭稍覺安徒隸昔我罹此地簷雷垂冰花今聞御溝上楊柳將萌芽秋曹郎官踐更遍我憂浩浩無津涯行坐不知所如往拘攣何異犬與豕肌肉半消但餘骨幾回驚見空咨嗟我聞張儉昔亡命李篤哀之不顧身趙岐曾依孫賓石至今意氣凌高旻遙遙此事向千載迨與夫子成三人力行古道恐不足顧我齷齪非其倫君有幽齋號分綠徑轉廊迴紆且複春來已發何樹花池上新添幾竿竹纍人萬一脫此樊籠見

白日攜琴竟就西軒宿會須一飲三百斛嗚呼生須一
飲三百斛縱死亦當化爲雙燕巢君屋

詔獄行

秋官署中有老吏能說先朝詔獄事當時國是日紛紜
太阿柄倒歸閹寺天子高居問尚公公卿標榜排清議
遂有羣凶作爪牙贊虎蒼鷹最毛鷲長樂宮前傳片紙
金吾夜半飛緹騎衛尉將軍身姓許提點官旗北鎮撫
讞決惟多王甫歡纍囚欲辯張湯怒洗垢新懸沈命法
揮毫已入追魂簿甫聞北闕殺劉陶旋見西亭尸竇武
白骨交撐裹赭衣殘骸誰敢收黃土爾曹自謂盤根株

殺人狐媚誇良圖豈知神理有反覆昊天明明安可誣
神姦脫距競菹醢亦有然臍當路衛長安萬姓歌且舞
賣釵鬻釧沽醪醐海水羣飛桑畝移俛仰乾坤又一時
三君八俊俱塵土膺滂田竇無墳基彤管堪嗟酷吏傳
青苔半蝕黨人碑我今胡爲淹此室園扉白日啼寒鴟
冤魂欲招不敢出但聞陰風蕭颯中心悲中心悲淚盈
把醪酒呼臯陶臯陶竟喑啞古來萬事難問天蠶室誰
憐漢司馬君不見城上烏啄人曾不問賢愚新鬼銜枚
向都市年年寒食聲嗚嗚

雙燕歌

雙燕復雙燕去歲春明江上見今年知我在網羅飛飛
萬里來相唁忽似天涯絕域中蹙然驟得逢親串支頤
強起暫爲歡撫事哀歌淚如霰吁嗟我生太荼苦羽毛
摧剝肌膚賤鴻雁高翔那肯顧鵲鴿夢斷空凝盼東風
夜夜吹歸心故園桃李開應遍燕兮少畱聽我語獄吏
雖苛不嗔汝長安挾彈多少年汝今銜泥向何處楚館
吳宮久寂寥野花爛熳繁遺礎翡翠樓頭許暫棲恐妨
思婦夢金閨宕子從軍去不返年年芳草春萋萋碧紗
窗外霏霏雨恨殺南飛鳥夜啼

春夜吟

白日欲落不肯落高墉傳箭收魚鑰隔戶啾啾嘯且啼
人耶鬼耶然疑作誰云此地夜如年欹斜之屋七九椽
官家許住不取直日高猶枕牆旣眠獨不記爲郎時盎
中無米恒苦飢羸馬東風可吹倒平明跨出猶恐遲

送別王朴齋奉使之金陵

薊門夏月榴花飛使君五兩驂駢駢長安冠蓋出相餞
故人凝望空沾衣憶昔論交片語間斗酒十千出肝膽
窮類虞翻爾所憐兄事袁絲我豈敢相期羽翮致青雲
何意分飛兩相失同輩連翩鷓鴣羣微軀況抱犬馬疾
古人往矣不可作似君意氣良所無丈夫許與在然諾

人生豈必同根株君家子猷近安不知我如此當滄流
錦帆落影白鷺渚洞簫且試秦淮游秦淮掩映芙蓉裏
夾岸朱樓照秋水萬一西風吹夢魂應念羈人寄雙鯉
贈別李董自之鄒平兼寄張幼量兄弟

故人家在長千里坐對澄江幾千咫十年不見鬚髯蒼
況我遭逢復如此蹇驢短劍燕市來含悽共舉芙蓉杯
田光鄒衍骨已枯痛哭何處昭王臺挂席飄然不肯住
乘風欲訪三山樹藕花歷亂蟬聲悲岐路徘徊爲誰故
白雲正滿徂徠山君當結廬在其間緘書寄淚張公子
欲往從之梁甫艱

送施尚白齋詔粵西

昔在先朝全盛日才人輩出肩相望濟南婁東擅獨步
起家同拜秋官郎白雲軼事在人口片詞隻句猶琳瑯
百有餘祀調遂寡作者誰復升其堂宣城詞客奮綵筆
重來西省生輝光前身應是謝太守風格不下陳思王
閱我姓名在囚隸定交折節楊旁赭衣逡巡不敢揖
況與法吏相頡頏一人知己死不恨區區此意安可忘
我皇獻壽長秋宮詔書捧出蓬萊殿解澤宏敷萬國
歡恩膏須使蠻方遍冠蓋煌煌四牡馳羨君坐策臨邛
傳鬱林父老困兵革初列編氓稱郡縣天生旌節使臣

威尉陀不敢仍南而明珠翠羽貢王庭元龜象齒紛來
獻鷓鴣南山毒霧垂猩猩晝立猿聲悲伏波銅柱今在
不武溪之箭饒哀思嶺南少人多怪石子文自此當幽
奇尹生今爲二千石與爾同門兄弟爲尹冀階爲粵西
太守施之同門
友與
余善尊酒相於儻問訊念余脫械當何時北鴈如經湘
水迴因風且寄南征詩

錢黍谷畫蘭歌

性本愛幽蘭常欲製爲佩得作江南游芳菲日相對晨
夕臥其下怡情惟灌溉惜哉中棄捐官貧莫能載錢郎
贈我白團扇綵毫善寫沅湘態烟姿霧質半空濛墨氣

淋漓羞粉纈我聞畫蘭如畫眉最難髣髴雙螺黛錢郎
本自江海人能事相成蓋有因坐擁嬋娟稱畏友牙籤
斑管常隨身羸馬歸來爽鳩署美人當鏡生微顰驕驕
之裘脫酤酒清樽對雨花開晨幽窗小鬟擘牋待玉臺
高咏聲何新雪兒十五能吳歌更解絲桐妙入神箏篴
一曲歌一闋流光宛轉飛梁塵綰袖濡毫染麝煤紫莖
綠葉交紛綸婉變能令卉木榮九畹開遍無冬春珍重
古人交誼好相思千里遺芳草裋褐逢君宛洛間抵掌
論文非不早便畱此幅付添丁大璐明璫信非寶篋有
吳江一疋練研光不減鵝谿縞東軒茶熟鶯正啼乘興

還須爲余掃何用重詢屈大夫看取文君作腹臬

米吉土生孫歌兼賀紫來進士

米侯多男人所羨三郎早被吳公薦天子賜對蓬萊宮
宮娥親滌蟾蜍硯詞賦已傳天下口更以深心托柔翰
寫罷鵝羣染雲族遠祖南宮近光祿弓冶相承筆有神
虎攫蛟蟠生鶻速妙解長康入三昧醉灑羊欣裙幾幅
慈仁閣下松風涼論文高憇支公堂我曾許汝非凡骨
駒駉今已凌康莊米侯挂冠前歲始環堵蕭條卻車軌
菊籬松徑陶徵君白麟奇木終童子平頭奴子喘汗趨
君家宅第懸桑弧吾儕締交閱三世紅顏那不成老夫

將君鬚酌君醴爲君高歌還拊髀願假數年各強健記
取今朝看醜洗人誇虎兒做小米

古銀槎歌

我有匣中銀鑿落碧山山人手所作背鏤至正壬寅字
點畫形模今宛若斷節枯根紛錯糾中有仙人博望侯
衣冠甚古鬚髯蒼飄飄一似乘孤舟肘後惜無筇竹杖
袖中或有安石榴人言八月泛天漢支機石畔逢牽牛
奇事流傳見圖畫鍊師何意窮雕鏤當年親致汗血馬
飽歷條支經大夏安知骨貌久銷歇供人把玩充杯斚
金人已去栢梁臺玉液常霑白蓮社嗟我瓠落溝斷同

潦倒賴爾衰顏紅有酒如澀不稱意欲求仙術尋壺公
跳身此槎之腹中窮源再入馮夷宮爲侯改號鴟夷翁
胡爲低眉偃蹇在塵世枕蛟騎虎愁吾躬

病中行

天上白榆星歷歷何年墮地叅天長扶疎不啻百歲外
輪囷已過十圍強三春恥共桃李華青帝勅與錢作花
誰鑄五銖及纁眼千緡萬緡條枝斜松栢雖稱卉木宗
讓爾多藏爲素封借蔭紛紛來衆鳥趨炎日日聚游蜂
狂飈捲地雷霆迅烈火燔身半爲燼枯槎無復挂青蚨
霜皮那得療飢饉鶯燕飛飛逝莫畱心空節斷巢鷓鴣

匠師屢過未肯顧樵客操斤將見求繁華衰瘠纔彈指
代謝千秋共如此君不見蜀道當年屬鄧家坐擁銅山
終餓死

蟋蟀吟

星晷暫風淒淒銀缸欲滅絳緯啼一聽攪人眠再聽霑
人衣朦朧不復辨蟲語哀鳴疑是杞梁妻螺贏在桑蟬
在柳爾獨何爲牀下棲我聞蜀帝之魂化爲鳥伯奇冤
憤爲伯勞放臣逐子棄妾怨友形體有時滅精誠鬱難
銷爾豈積怨深痛之所感胡爲乎迎霜泣露而悲號乍
長鳴忽短歌草根趨趨羣相和羽聲斷絕商聲多客子

無衣不能飯噫噫況有南飛鴈

九哀歌

有兄有兄伯與仲時人謬比潁川鳳仲兮銜冤發憤死
廣柳車中一長慟伯兮衰老邁讒賊齒牙落盡眼復瞢
藥葬園扉席作棺芻車麥飯誰爲送死而爲厲魂安歸
披髮叫天天欲動鵲鵲分飛雉在羅啼鳥啞啞驚宵夢
嗚呼一歌兮心煩憂白骨何時還首邱

有嫂有嫂幼哺我見我名成喜則那半夜鵲鵲屋上啼
烈澤焦原因燭火蒼蠅但欲飽人肉流血十指連雙髀
姊姒惇惇稱未亡宅爲牢狴層層鎖背麻久換綠羅裙

螢藜堪抵明珠顆雖無兒女共牽衣婢妾哀哀飢且裸
嗚呼二歌兮風淒淒天門咫尺回金雞

有女有女隔鄉縣十年不見阿爺面外孫大者已總角
孝經魯論皆能徧錢塘署中聞禍作痛殺衰翁與佳倩
間道殷勤遣僕來念我無衣復無膳山桑之絲織者誰
蘭閨手絰機中線吾衰已抱中郎恨況復顛連遭天譴
嗚呼三歌兮百憂攻何由得似淳于公

有婦有婦勤紡織薄宦馳驅到江國突如其來縱騎至
舉家相對無人色小臣繫纍罪所當何意妻孥轅亦北
寸帛銖鈞不着身羅網高張何處匿窮愁慰藉叔與兄

兄也客死悲殊域老母眼枯雙耳聾坐起相依視眠食
嗚呼四歌兮不忍言書空咄咄聲還吞

有妹有妹寡且孤夫亡翁死畱二雛不弔於天霜雪酷
掌中忽碎青珊瑚大男伶仃陷羅織可憐已作髡鉗奴
腴田高厦不自保他人入室吹笙竽父兮母兮生我時
愛之不異明月珠夜臺有書不得寄知我如此顰雙臚
嗚呼五歌兮心斷絕暮雨秋蟲共幽咽

有姪有姪方稚齒長是翁男幼兒子兩世三人共我身
拊摩忍別非毛裏鴟梟鴟梟爾何苦破巢毀卵心無已
敲殘血肉呼蒼天肯使家聲玷青史癡兒嬌小廢筆墨

但索棗梨弄秋水嗚呼六歌兮鼻酸嘶爾父不暝在黃泥

有甥有甥瘦熒熒跣足履霜半面黥赭衣相對不復識
問荅甫畢中心驚古云宅相理或有今何憔悴昔何榮
主人居汝爲奇貨不遣牧馬傭書輕豈知故國桑田改
甲第雖存主已更我躬不閔三黨盡何人贖汝歸柴荆
嗚呼七歌兮涕滂沱渭陽之情痛若何

有僕有僕困蜂蠆十人九人遭繫械僵尸纍纍化青燐
存者支離人鬼界敝廬封鎖隴畝荒禾黍無收長蒲稗
老穉三五伴吾居喪家之狗霜中薤飢來并日不一飽

爾是官身那肯賣西園錦樹鬱青蔥繁華幾日高柯壞
嗚呼八歌兮搔白首勞汝曾無一杯酒

我生之日月在箕踞訛屢觀今倍奇下吏羞稱牛馬走
遺憂惟誦豺虎詩方良載鬼魑魅笑侃侃對簿無撓辭
皇天后土實降鑒臣體可虧名不虧臯陶曰殺堯曰宥
高高者天聽乃卑七尺幸存繫一髮不然若敖將餒而
嗚呼九歌兮腸九迴我見白日死不哀

奉和錢玉章雨後見懷之作

羈棲盛夏如寒谷淚化愁霖千萬斛何人喚起潭底龍
顧我已似庖中鹿堯曰宥之不待三臣今老矣將及六

雌蜺半滅乳燕飛願得銜泥向君屋

菎豆花

美人樓閣臨秋水愛種幽蘭紉香芷
盲風害雨崇朝集紫莖墮地紅蕖死
數椽茅屋野人家雞犬依依靜不譁
牆頭菎豆無人採青子纍纍紅白花

關山夢

關山上與星辰逼魚貫猿梯費攀陟
如歌如哭石泉聲半紫半黃秋樹色
十年驅馬賦西征曾共西巖麋鹿盟
今日煙霞生枕上乘風欲去吹瑤笙

漁家詞

南陽之南嶧山北男子不耕女不織伐蘆作屋沮洳間
天遣魚蝦爲稼穡少婦能操舴艋舟生兒酷似鷓鴣黑
今秋無雨湖水涸大魚乾死鱗鰵弱估客不來賤若泥
租吏到門勢欲縛烹魚酌酒幸無怒泣向前村賣網罟
夏日過廣慧菴作呈米吉士

同州刺史延陵君於此觴客當宵分梨園子弟梁玉班
歌喉婉轉遏行雲是時新經亂離後吾儕尚得銜杯酒
老僧借我精藍居梵唄書聲滿林藪君家諸子鯉庭趨
競爽復與王郎俱更端設問悅以解聽我揮塵談黃虞
奇文一出恣歡歎每到平原欲焚視自從割席各成名

貴不如人亦不賤尚書父子踐三台雲也天駟行天街
蜀道之難在跬步先生因賦歸去來雨餘并馬款雙扉
影堂寂寂流塵飛天外碧雲自繚繞堦前紅藥徒芳菲
高座欣然具五簋認是焚香舊童子驚心十載剎那間
榮瘁升沉一彈指最愛青青雙檜樹幾度摩挲不忍去
月出堪思抱膝時鶯啼似識聞歌處綠邸朱輪未可親
緇衣白社近爲鄰誰憐華髮滄州客飽看元都觀裡人
舟中懷米吉土作長歌寄之

歸之

吉土喪偶博訪名姝
吳門錢氏閨吉土名

二十年前識君而衆中一顧能知腕把臂登樓恨見遲

白晳紅顏俱弱冠君家居近宣武門過從往往羅諸昆
石丈齋頭風翠嶺有時醉臥梅花根燈市歸來雪盈丈
下馬天街歡拊掌亂踏瓊瑤貼地眠千金不惜王恭斲
自傷憂患一身經回首當時涕泗零殺機豈爲題鸚鵡
蔓引尤憐到鵲鴿故人唁我更名姓欲語吞聲不敢竟
一朝閭闔放金雞狂呼稽首天王聖華髮相看老更親
更生不死鄭虔貧西郊芳草梨花岸南陌春風明月輪
避地從來稱輦下一枝喜近陶公舍破帽何妨醉尉嗔
青鞵屢向山僧借安知此福亦難消又看錢塘八月潮
窮巷閉門愁悶寂扁舟衝浪歎蕭條欲行不行心斷續

琴歌牧犢朝飛曲吳姬新寡茂陵居皓齒明眸美如玉
窺君久矣君莫辭好將綵筆畫蛾眉雙鯉封題螺子黛
歸來重補定情詩

三犬行

君不見堵侯義犬天下無霜毛黑質形於菟獸三爲羣
繞環堵一聞剝啄聲號呼主人于鬣出迎客搖尾屏息
來座隅寒暄問荅各有以主人顧犬良嗟吁自言寒帷
過通肆狗屠牽犬犬惴惴俸錢贖歸事偶然兒童解縛
官府飼夜繞周廬共踐更奴子蒼頭得飽睡自從解綬
傷羈旅我突不黔愁糗糒吏人鳥散呼不來重銜零落

韓盧淚支離幸免腰如磬稂莠蠹蝥滿三徑西鄰豪華
競田獵擇人而事惟汝聽犬雖不言對以臆樂飢甘守
萊蕪旣出隨羸馬入衙衣長貧我亦心爲定客開茲語
涕如瀉對此鬢鬢不忍咤多少人倫懷二心至交賣友
生妻嫁子密不義封通侯豺虎肝腸人面假朝蒙濯漑
暮彎弧丹雉白狗胡爲者堵侯大笑酒復醺爲犬作傳
聞奇聞君有傲蓋幸無棄豢養終始當殷勤萬一飢寒
有一斃埋向崑山黃耳墳

瑯琊公子歌爲奇玉宗兄作

瑯琊公子吾家彥少年作賦靈光殿稷下諸生望後塵

千里驂騑掃飛電拜前拜後兩中丞讜論家聲九重羨
豪貴爭廻御史驄顧廚競識中郎而賤子肩隨朱雀桁
駿馬輕裘共歡燕黃塵碧海事須臾太息今爲轅下駒
官舍那能生苜蓿俸錢空自羨侏儒進學解成長乞米
荅賓戲就還覆醅我來君已撤臯比齋夫行炙兒童趨
昨日銓曹下除目蜀道蠶叢愁匍匐白帝城邊杜宇啼
黃牛峽裡蒼猿哭錦城雖樂不如歸折腰況復謀餽粥
飲君白玉甌攜手登高樓勸君且作西南游丈夫足跡
須令九州遍安能效見女子深閨局東懷故邱古人成
名半丞尉猗嗟天駟隨旄牛此地由來盛方物小第因

君有所求扶老但需筇竹杖得時且寄海東頭

王郎行爲王會疇孝廉作

吁嗟乎我生之後漢葉微開元盛日無由見枉矢妖弧
帶玉除三川奕奕騰雷電世俗崔巍太行險人情預逐
桑田變生死誰論范式交要盟竟襲陳餘傳肝膽楚越
安足論平生雅與王郎善王郎磊落慷慨姿少年早領
吳公薦醉後能彎繁弱弓彩毫勁敵忘歸箭疇昔論文
滄海曲氣酣笑指銀河轉憐余空負驕驕毛鹽車已老
霜蹄倦青鬃雖無青眼存寸心耿耿明如練燕市同銜
鸚鵡杯悲歌不見芙蓉殿金羈翠袖翩翩客平明入侍

承華宴青驄去踏綠楊花珊瑚鞭影人爭羨向平驕語
徒虛耳誰道繁華不如賤王郎拔劍繞柱呼起視殘星
半欲無自言恐蹈周顒誚勸我休嗟轅下駒春鶯相待
且歸去明日跨驢訪釣徒

聽鐘鳴小片

余覽北魏詩有蕭綜聽鐘鳴悲落葉二篇詞甚
淒惋彼以貴藩播越不失顯廕然尚內不自得
有憂生飄泊之嗟矧余羈囚日與法吏爲伍每
當宵箚將終晨鐘發響淒戾之音心飛魂慄詎
必聽猿而涕下聞琴而累歎哉歲時晚晚庭樹

凄然爰效其體以識余之憤懣焉

聽鐘鳴所聽非一聲一聲纔到枕雙淚忽縱橫白頭老
鳥作鬼語羣飛啞啞還相驚明星落悲風哀關山宕子
行不返高樓思婦難爲懷何況在羅網夜半聞殷雷無
縻復無褐腸內爲崩摧聽鐘鳴心獨苦獄吏抱鑰來不
許吞聲哭

悲落葉

悲落葉落葉紛相接無復語流鶯飄搖舞黃蝶朝如繁
華之佳人夕若蘼蕪之棄妾因風起從風飛放臣羈客
那忍見攀條攬扼空沾衣徘徊繞故枝柯幹長乖違凜

凜歲云暮此去將安歸悲落葉傷心胸願因征鳥翼吹我到鄉中

棧道平歌爲賈膠侯尚書作

君不見梁州之谷斜與褒中有棧道干雲霄仰手可以捫東井下臨長江浩汙洶波濤大禹胼胝恐未到帝遣五丁開神臯巨靈運斧地維絕然後南通巴蜀西羗鬣蛇盤縈紆六百里千迴萬曲緣秋毫懸車束馬弗可以徑度飛騰絕壁愁猿猱漢家畱侯真婦女烈火一炬嗟徒勞噫嘻乎三秦之人困征戍軍書蠡午如蝟毛銜枚荷戈戟轉粟窮脂膏估客爾何來萬里競錐刀須臾失

足幾千仞猛虎虬蛇恣貪饕出險醺酒始相賀
燐燐鬼火聞呼號泰運開尚書來恩如雨露威風雷一呼集
眷鍾再呼伐薪柴醇醑澆山萬夫發坐看巖巖削盡爲平
埃噫嘻乎益烈山澤四千歲火攻莫救蒼生災昔也商旅
魚貫行今也不憂狼與豺昔也單車不得上今也康莊之塗
可以走連轡輶童巴舞貢天府桃笙寶布輸叩疎歌幽風擊土鼓
賈父之來何晚哉豐功奕奕垂萬禩經濟不數韋臯才中
朝衮衣待公補璿璣在手平泰階西望劍閣高崔巍側身
欲往空徘徊大書深刻告來世蛟龍岌業磨青崖金穿石
泐陵谷徒我公之功不與伏

波銅柱同塵埋

孫永年敬刊

曾孫

字宜宣

校訂

安雅堂未刻稿卷第二終